


陝西通志



第四十六卷

祥異一

DS  
793  
S45S5  
1735  
v.46







陝西通志第四十六卷

祥異一

洪範建極休咎聿徵保章星土次舍攸憑生尅相沴五行互乘鳴岐周應聚井漢興昭應山立壺口河澄民風吏治如香上升機祥示儆有勸有懲鑒於往昔以永凝承作祥異志第二十二

殷

祖甲二十八祀季歷生昌有聖瑞史記周本紀尚書帝命驗云季秋之月

甲子赤爵啣丹書入於鄆止於昌戶本紀注

帝乙三祀夏六月周地震○八祀周文公元年有鳳集於岐山竹書○

十五祀周文公蒞國八年歲六月文王寢疾五日而地動東西南北不出國郊羣臣皆恐請移之文王曰奈何對曰興事動衆以增國城其可乎文王曰不可夫天道見妖以罰有罪也今又專興事



動衆以增國城是重吾罪也昌也請改行重善以移之無幾何而

疾止

韓詩外傳

帝辛十有九祀周王宅程三年遭天之大荒

汲冢

**周**

成王二年周公居東秋大熟未獲天大雷電以風禾盡偃大木斯拔

邦人大恐王啓金縢之書乃得周公所自以爲功代武王之說王

執書以泣曰今天動威以彰周公之德惟朕小子其親迎王出郊

天乃雨反風禾則盡起二公命邦人凡大木所偃盡起而築之歲

則大熟

尚書金縢

○三十四年雨金於咸陽

竹書

宣王三十年有兔舞於鎬京

竹書

幽王二年西周三川皆震伯陽甫曰周將亡矣夫天地之氣不失其序若過其序民亂之也陽伏而不能出陰迫而不能蒸於是地



震今三川實震是陽失其所而填陰也陽失而在陰原必塞原塞國必亡夫水土演而民用也土無所演民乏財用不亡何待昔伊洛竭而夏亡河竭而商亡今周德若二代之季矣其川原又塞塞必竭川竭山必崩夫國必依山川山崩川竭亡國之徵也若國亡不過十年數之紀也天之所棄不過其紀是歲三川竭岐山崩

周語

○幽王時牛化為虎羊化為狼今洛南有避狼城云

述異記

平王二十四年秦文公十九年得陳寶

史記秦本紀

索隱曰太康地志云

秦文公時陳倉人獵得獸若龜不知名牽以獻之逢二童子童子曰此名為媼常在地中食死人腦即欲殺之拍撞其首媼亦語曰二童子名陳寶得雄者王得雌者霸陳倉人乃逐二童子化為雉

雌上陳倉北坂為石

本紀注

惠王十三年魯莊公三十年九月庚午朔日有食之劉歆以為八月



秦分○二十二年魯僖公五年九月戊申朔日有蝕之劉歆以爲

七月秦分

漢書五行志

襄王六年秦饑晉閉之糴

左傳

定王二十一年成五年梁山崩遏河水三日不流召伯尊遇輦者不

避使車右鞭之輦者曰所以鞭我者其取道遠矣伯尊因問之輦

者曰君親編素率羣臣哭之斯流矣如其言而河流

穀梁傳

靈王十九年魯襄公二十年十月丙辰朔日有食之劉歆以爲八月

秦分○二十年魯襄公二十一年九月庚戌朔日有食之劉歆以

爲七月秦分十月庚辰朔日有食之劉歆以爲八月秦分

漢書五行志

景王丁四年晉昭公元年河赤龍門三里

史記晉世家

烈王七年秦獻公十六年桃冬花

秦本紀

顯王二年河赤龍門三日

竹書

秦獻公十八年雨金櫟陽

史記秦本紀

○八



年秦孝公元年彗星見西方六國表○二十八年秦孝公二十一年有

馬生人劉向以為孝公始用商君攻守之法東侵諸侯其象將以

兵革抗極成功而還自害也漢書五行志○三十三年秦惠王二年有

新生嬰兒曰秦且王史記秦紀贊

慎靚王元年秦孝文王五年遊胸衍有獻五足牛者劉向以為近牛

禍也先是文惠王初都咸陽廣大宮室南臨渭北臨涇思心失逆

土氣足者止也戒秦建止奢泰將致危亡秦遂不改至於離宮三

百復起阿房未成而亡又曰牛以力為人用足所以行也其後秦

大用民力轉輸起負海至北邊天下叛之漢書五行志○按漢書作孝文王五年考史記

六國表孝文止一年而惠文王五年有北遊戎池事胸衍本戎池漢書孝文王疑有訛也

赧王元年梁惠王二十一年河渭絕一日史記魏世家徐廣註○七年秦武王

三年渭水赤者三日○十年秦昭襄王二年彗星見○十二年昭



襄王四年彗星見○十九年昭襄王十一年彗星見秦本紀○二十

八年昭襄王二十年秦地有父馬生駒牡馬生牛而死秦本紀○  
徐廣註

四十二年昭襄王三十四年渭水赤三日劉向以為近火沴水也

秦連相坐之法棄灰於道者黥罔密而刑虐加以武伐橫出殘賊

隣國至於變亂五行氣色謬亂天戒若曰勿為刻急將致敗亡秦

遂不改至始皇滅六國二世而亡昔三代居三河河洛出圖書秦

居渭陽而渭水數赤瑞異應德之效也漢書五行志

**秦**

始皇初即位冬雷漢書五行志○九年四月寒凍有死者史記秦始皇本紀○二

十六年童謠云阿房阿房亡始皇述異記○三十六年秋使者從關

東夜過華陰平舒道有人持璧遮使者曰為我遺滈池君因言曰

今年祖龍死使者問其故因忽不見置其璧去使者奉璧具以聞



始皇默然良久曰山鬼固不過知一歲事也退言曰祖龍者人之

先也使御史府視璧乃二十八年行渡江所沈璧也史記秦始皇本紀○

秦時狼入咸陽市洪範五行傳

二世元年宮中雨金頃刻皆化為石述異記漢高祖為亭長送徒驪山

被酒夜徑澤中令一人行前行前者還報曰前有大蛇當徑願還

高祖醉曰壯士行何畏乃前拔劍斬蛇蛇分為兩道開行數里醉

困卧後人來至蛇所有一老嫗夜哭人問嫗何哭嫗曰人殺吾子

人曰嫗子何為見殺嫗曰吾子白帝子也化為蛇當道今者赤帝

子斬之故哭史記高祖本紀

**漢**

高祖元年十月五星聚東井以曆推之從歲星也此高皇帝受命之

符也漢書天文志高允曰漢元年冬十月五星聚於東井此乃曆術之



淺今譏漢史而不覺此謬恐後人譏今猶今之譏古崔浩曰所謬云何允曰案星傳金水二星常附日而行冬十月日在尾箕昏沒於申南而東井方出於寅北二星何因背日而行是史官欲神其事不復推之於理浩曰欲爲變者何所不可君獨不疑三星之聚而怪二星之來允曰此不可以空言爭宜更審之時後歲餘浩謂允曰先所論者本不注心今更考究果如君語以前三月聚於井非十月也魏書高允傳○二年關中大饑米斛萬錢人相食令民就食

蜀漢

漢書高帝本紀

惠帝二年宮中雨黃金黑錫述異記

○三年秋七月都廐災○四年三

月甲子長樂宮鴻臺災

漢書惠帝本紀

十月乙亥未央宮凌室災丙子織

室災劉向以爲元年呂太后殺趙王如意殘戮其母戚夫人是歲十月壬寅太后立帝姊魯元公主女爲皇后乙亥凌室災明日織



室災凌室所以供養飲食織室所以奉宗廟衣服天戒若曰皇后  
亡奉宗廟之德將絕祭祀其後皇后亡子後宮美人有男太后使  
皇后名之而殺其母惠帝崩嗣子立有怨言太后廢之更立呂氏  
子弘為少帝賴大臣共誅諸呂而立文帝惠后幽廢之五行志○七年  
雷震南山林木皆自火燃至根其地悉焦黃後其雨迅過人就其  
間得龍骨一具述異記

呂后三年夏漢中大水水出流四千餘家○八年三月拔霸上還過  
枳道見物如倉狗擻高后掖忽而不見卜之趙王如意為祟遂病  
掖傷而崩夏漢中水復出流六千餘家是時女主獨治諸呂相王

漢書五行志

文帝七年六月癸酉未央宮東闕眾愚災東闕所以朝諸侯之門也  
眾愚在其外諸侯之象也五行志



後二年四月乙巳水火木三合於東井占曰外內有兵東井秦也是歲誅反者周殷於長安市

天文志

○三年秋大雨晝夜不絕三十

五日藍田山水出流九百餘家渰壞民室八千餘所殺三百餘人先是趙人新垣平以望氣得幸爲上立渭陽五帝廟欲出周鼎以夏四月郊見上帝歲餘懼誅謀爲逆發覺要斬夷三族是時比再遣公主配單于賂遺甚厚匈奴愈驕侵犯北邊殺畧多至萬餘人漢連發軍征討戍邊○四年四月丙辰晦日有食之在東井十三

度

五行志

景帝元年漢武帝未誕時景帝夢一赤彘從雲中直下入崇蘭閣帝覺而坐於閣上果見赤氣如煙霧來蔽戶牖望上有丹霞翳鬱而起乃改崇蘭閣爲猗蘭殿後王夫人誕武帝於此殿有青雀羣飛於霸成門乃改爲青雀門乃更修飾刻木爲綺橈雀去因名青



門述異

記

○四年七月癸未火入東井行陰又以九月己未入輿鬼

戊寅出占曰為誅罰又為火災後二年有栗氏事其後未央東闕

災

漢書天文志

中元年填星當在觜觿參去居東井其三年五月甲午金木俱在

東井戊戌金去木留守之二十日占曰傷成於戌木為諸侯誅將

行於諸侯也○四年四月丙申金木合於東井占曰為白衣之會

其六年天子四衣白臨邸第

天文志

○五年八月己酉未央宮東闕

災先是栗太子廢為臨江王以罪徵詣廷尉自殺丞相條侯周亞

夫以不合旨稱疾免後二年下獄死

五行志

後元年五月壬午火金合於輿鬼之東北不至柳出輿鬼可五寸

占曰為爍有喪丙戌地大動鈴鈴然民大疫死棺貴至秋止

天文志

武帝建元六年熒惑守輿鬼占曰為火變有喪是歲高園有火災竇



太后崩

天文志

四月壬子高園便殿火上素服五日

武帝本紀

元光二年七月京師雨雹

西京雜記

元狩元年上郊雍獲一角獸若麋然有司曰陛下肅祗郊祀上帝

報享錫一角獸蓋麟云

史記武帝本紀

建章宮後閣重櫺中有物出焉其

狀似麋以聞武帝往臨視之問左右羣臣習事通經術者莫能知

詔東方朔視之朔曰臣知之願美酒梁飯大飧臣臣乃言詔曰可

已飧又曰某所有公田魚池蒲葦數頃陛下以賜臣臣乃言詔曰

可於是朔乃肯言曰所謂騶牙者也遠方當來歸義而騶牙先見

其齒前後若一齊等無牙故謂之騶牙其後一歲所匈奴渾邪王

果將衆十萬來降漢乃復賜東方生錢財甚多

滑稽列傳

元鼎元年汾陰得鼎以聞天子以禮祠迎鼎至甘泉從上行薦之

至中山晏溫有黃雲蓋焉有鹿過上自射之因以祭云公卿大夫



請尊寶鼎曰鼎至甘泉光潤龍變承休無疆合茲中山有黃白雲

降蓋若獸為符路弓乘矢集獲壇下報祠大饗唯受命而帝者心

知其意而合德焉鼎宜見於祖禰藏於帝廷以合明應制曰可武帝

本紀 ○三年正月戊子陽陵園火漢書武帝本紀 ○五年四月丁丑晦日有

食之在東井二十三度五行志 十一月辛巳朔旦冬至立泰時於甘

泉天子親郊見朝日夕月詔曰望見泰一修天文壇辛卯夜若景

光十有二明武帝本紀

元封元年秋有星茀於東井史記武帝本紀 韋昭曰秦分也衛太子兵亂

本紀 ○二年有芝生殿防內中天子乃下詔曰甘泉防生芝九莖

赦天下毋有復作武帝本紀 大寒雪深五尺野鳥獸皆死牛馬蹢躅如

蝟三輔人民凍死者十有二三西京雜記

太初元年秋蝗從東方飛至敦煌漢書武帝本紀 十一月乙酉柏梁臺災



先是大風發其屋夏侯始昌先言其災日後有江充巫蠱衛太子  
事五行志

征和四年二月丁酉隕石於雍二聲聞四百里漢書武帝本紀帝嘗見彗

星東方朔折指星木以授帝帝以木止彗星星尋則歿也星出之

夜野獸盡鳴別說謂之獸鳴星洞冥記○武帝時蜀張寬為侍中從

祀甘泉至渭橋有女子浴於渭水乳長七尺上怪其異遣問之女

云第七車知我已知寬在第七車對曰天星主祭祀者齋戒不潔

則女人星見益都耆舊傳未央宮殿前鐘無故自鳴三日夜乃止帝以

問東方朔對曰銅者土之子以陰陽氣類言之子母相感恐山有

摧陲者越三日南郡太守以山崩為言漢武別傳

昭帝始元元年春二月黃鵠下建章宮太液池中秋七月大雨渭陽

絕漢書昭帝本紀○始元中太白出東方入咸池東下入東井人臣不出



有謀上者

天文志

○昭帝時上林苑中大柳樹斲仆地一朝起立生

枝葉有虫食其葉成文字曰公孫病已立後昭帝崩無子徵昌邑

王賀嗣位狂亂失道霍光廢之更立昭帝兄衛太子之孫是爲宣

帝本名病已

五行志

元鳳四年五月丁丑孝文廟正殿災劉向以爲孝文太宗之君與

成周宣榭火同義先是皇后父車騎將軍上官安安父左將軍桀

謀爲逆大將軍霍光誅之皇后以光外孫年少不知居位如故光

欲后有子後宮皆不得進皇后年六歲而立十三年而昭帝崩遂

絕繼嗣光執朝政猶周公之攝也是歲正月上加元服通詩尚書

有明哲之性光無周公之德而秉政九年久於周公上旣已冠而

不歸政將爲國害故正月加元服五月而災見古之廟皆在城中

孝文廟始出居外天戒若曰去貴而不正者

五行志



元平元年昌邑王賀卽位天陰晝夜不見日月賀欲出光祿大夫  
夏侯勝當車諫曰天久陰而不雨臣下有謀上者陛下欲何之賀  
怒縛勝以屬吏吏白大將軍霍光光時與車騎將軍張安世謀欲  
廢賀光讓安世以爲泄語安世實不泄召問勝勝上洪範五行傳  
曰皇之不極厥罰常陰時則有下人伐上不敢察察言故云臣下  
有謀光安世讀之大驚以此益重經術士後數日卒共廢賀此常  
陰之明效也

五行志

宣帝卽位尊孝武廟爲世宗巡狩郡國皆立廟告祠世宗廟日有白  
鶴集後庭以立世宗廟告祠孝昭寢有鴈五色集殿前

郊祀志

本始四年七月甲辰熒惑入輿鬼天質占曰大臣有誅者名曰天

賊在大人之側

天文志

地節三年長安雨黑粟

玉海



元康元年三月甘露降未央宮○二年夏神雀集雍

宋書符瑞志

○三

年春五色鳥以萬數飛過屬縣翺翔而舞欲集未下其令三輔無

得以春夏摘巢探卵彈射飛鳥○四年三月神雀五采以萬數集

長樂未央北宮高寢甘泉泰畤殿中及上林苑金芝九莖產於函

德殿銅池中

漢書宣帝本紀

神雀二年正月乙丑鳳凰甘露降集京師羣鳥從以萬數○四年

春二月鳳凰甘露降集京師修興太一五帝后土之祠鸞鳳萬舉

蜚覽翺翔集止於旁齋戒之暮神光顯著薦鬯之夕神光交錯或

降於天或登於地或從四方來集於壇冬十月鳳凰十一集杜陵

十二月鳳凰集上林

宣帝本紀

五鳳二年正月甘露降京師

宋書符瑞志

○三年郊上帝祀后土神光

並見三月辛丑鸞鳳集長樂宮東闕中樹上飛下止地文書五色



留十餘刻吏民並觀

漢書宣帝本紀

甘露元年夏四月黃龍見新豐

宣帝本紀

建章未央長樂宮鐘簴銅人

皆生毛一寸所

郊祀志

甲辰孝文廟災○四年冬十月丁卯未央宮

宣室閣火

宣帝本紀

黃龍元年未央殿輅軫中雌雞化為雄毛衣變化而不鳴不將無

距劉向以為鷄變乃國家之占后妃象也孝元王皇后以甘露二

年生男立為太子妃王禁女也黃龍元年宣帝崩太子立是為元

帝王妃將為皇后是歲未央殿中雌雞為雄明其占在正宮也不

鳴不將無距貴始萌而尊未成也○宣帝時大司馬霍禹所居門

第自壞時禹內不順外不敬見戒不改卒受滅亡之誅

五行志

宣帝

時江淮饑饉雨穀三秦亡穀二十頃

述異記

元帝初元三年四月乙未孝武園白鶴館災劉向以為先是前將



蕭望之光祿大夫周堪輔政爲佞臣石顯許章等所譖望之自殺  
堪廢黜明年白鶴館災園中五里馳逐走馬之館不當在山陵昭  
穆之地天戒若曰去貴近逸遊不正之臣將害忠良後章坐走馬  
上林下烽馳逐免官○初元中丞相府史家雌鷄伏子漸化爲雄  
冠距鳴將劉向以爲无帝初元元年將立王皇后先以爲婕妤三  
月癸卯制書曰其封婕妤父丞相少史王禁爲陽平侯位特進丙  
午立王婕妤爲皇后明年正月立皇后子爲太子故應是丞相府  
史家雌鷄爲雄其占卽丞相少史之女也伏子者明已有子冠距  
鳴將者尊已成也

漢書五行志

永光四年六月甲戌孝宣杜陵園東闕南方災劉向以爲先是上  
復徵用周堪爲光祿勳及堪弟子張猛爲太中大夫石顯等復譖  
毀之皆出外遷是歲上復徵堪領尚書猛給事中石顯等終欲害



之園陵小於朝廷闕在司馬門中內臣石顯之象也孝宣親而貴門闕法令所從出也天戒若曰去法令內臣親而貴者必為國害後堪希得進見因顯言事事決顯口堪病不能言顯誣告張猛自殺於公車

五行志

建昭元年秋八月有白蛾羣飛蔽日從東都門至枳道○四年六

月藍田地沙石雍霸水安陵岸崩雍涇水水逆流

元帝本紀

竟寧元年長陵銅駝生毛端開花

酉陽雜俎

○元帝時童謠曰井水溢

滅竈烟灌玉堂流金門至成帝建始二年三月戊子北宮中井泉

稍上溢出井水陰也竈煙陽也玉堂金門至尊之象陰盛而滅陽

竊有宮室之應也

漢書五行志

成帝建始元年正月乙丑皇考廟災初宣帝為昭帝後而立父廟於禮不正是時大將軍王鳳顯權擅朝甚於田蚡將害國家故天於



元年正月而見象也

五行志

六月有青蠅無萬數集未央宮殿中朝

者坐十二月大風拔甘泉時中大木十圍以上

成帝本紀

○三年夏大

水三輔霖雨三十餘日郡國十九雨山谷水出凡殺四千餘人壞

官寺民舍八萬三千餘所十月丁未京師相驚言大水至渭水虎

上小女陳持弓年九歲走入橫城門入未央宮尚方掖門殿門門

衛戶者莫見至句盾禁中而覺得民以水相驚者陰氣盛也小女

而入宮殿中者下人將因女寵而居有宮室之象也名曰持弓有

似周家檠弧之祥易曰弧矢之利以威天下是時帝母王太后弟

鳳始爲上將秉國政天知其後將威天下而入宮室故象先見也

其後王氏父子兄弟五侯秉權至莽卒篡天下蓋陳氏之後云

五行

志

冬十二月戊申朔夜地震未央宮殿中

成帝本紀

○四年十一月乙

卯月食填星星不見時在輿鬼西北八九尺所占曰月食填星流



民千里河平元年三月流民入函谷關

天文志

九月長安城南有鼠

啣黃蒿柏葉上民塚柏及榆樹上爲巢桐柏尤多巢中無子皆有

乾鼠矢數升時議臣以爲恐有水災鼠盜竊小虫夜出晝匿今晝

去穴而登木象賤人將居顯貴之位也桐柏衛思后園所在也其

後趙皇后自微賤登至尊與衛后同類趙后終無子而爲害明年

有鳶焚巢殺子之異也一曰皆王莽竊位之象云京房易傳曰臣

私祿罔辟厥妖鼠巢

五行志

河平元年四月己亥晦日有食之不盡如鉤在東井六度長安男

子石良劉音相與同居有如人狀在其室中擊之爲狗走出去後

有數人被甲持兵弩至良家良等格擊之或死或傷皆狗也自二

月至六月乃止

五行志

○二年十月下旬填星在東井南端大星尺

餘歲星在其西北尺所熒惑在其西北二尺所皆從西方來填星



貫輿鬼先到歲星次熒惑亦貫輿鬼十一月上旬歲星熒惑西去

填星皆西北逆行占曰三星若合是為驚位是為絕行外內有兵

與喪改立王公天文志○四年白鳥集孝文廟下玉海壬申長陵臨涇

岸崩雍涇水漢書成帝本紀

鴻嘉二年三月博士行大射禮有飛雉集於庭歷階登堂而雉後  
雉又集太常宗正丞相御史大夫大司馬車騎將軍之府又集未  
央宮承明殿屋上時大司馬車騎將軍王音待詔寵等上言天地  
之氣以類相應譴告人君甚微而著雉者聽察先聞雷聲故月令  
以紀氣經載高宗雉雉之異以明轉禍為福之驗今雉以博士行  
禮之日大衆聚會飛集於庭歷階登堂萬衆睢睢驚怪連日徑歷  
三公之府太常宗正典宗廟骨肉之官然後入宮其宿留告曉人  
具備深切雖人道相戒何以過是○三年八月乙卯孝景廟北闕



災十一月甲寅許皇后廢

五行志

永始元年正月癸丑大官凌室災戊午戾后園南闕災是時趙飛燕大幸許后既廢上將立之故天見象於凌室與惠帝四年同應戾后衛太子妾遭巫蠱之禍宣帝既立追加尊號於禮不正又戾后起於微賤與趙氏同應天戒若曰微賤亡德之人不可以奉宗廟將絕祭祀有凶惡之禍至其六月丙寅趙皇后遂立姊妹驕妬賊害皇子卒皆受誅○四年四月癸未長樂宮臨華殿及未央宮東司馬門災六月甲午孝文霸陵園東闕南方災長樂宮成帝母王太后之所居也未央宮帝所居也霸陵太宗盛德園也是時太后三弟相續秉政舉宗居位充塞朝廷兩宮親屬將害國家故天象仍見

五行志

元延元年正月長安章城門門牡自亡谷永對曰章城門通路最



之路城門守國之固固將去焉故牡飛也七月辛未有星孛於東

井踐五諸侯出河戍北

五行志

○四年甘露降京師

成帝本紀

綏和二年二月大廐馬生角在左耳前圍長各二寸是時王莽為

大司馬害上之萌自此始矣八月庚申鄭通里男子王褒衣絳衣

小冠帶劍入北司馬門殿東門上前殿入非常室中解帷組結佩

之招前殿署長業等曰天帝令我居此業等收縛考問褒故公車

大誰卒病狂易不自知入宮狀下獄死是時王莽為大司馬哀帝

卽位莽乞骸骨就第天知其必不退故因是而見象也姓名章服

甚明徑上前殿路寢入室取組而佩之稱天帝命然時人莫察後

莽就國天下寃之九月丙辰地震自京師至北邊郡國二十餘壞

城郭凡殺四百一十五人

五行志

○成帝時雍大雨壞平陽宮垣災

林光宮門

郊祀志

成帝時童謠曰燕燕尾涎涎張公子時相見木門



倉琅根燕飛來喙皇孫皇孫死燕喙矢其後帝爲微行出遊常與富平侯張放俱稱富平侯家人過河陽主作樂見舞者趙飛燕而幸之故曰燕燕尾涎涎美好貌也張公子謂富平侯也木門倉琅根謂宮門銅鑊言將尊貴也後遂立爲皇后弟昭儀賊害後宮皇子卒皆伏辜所謂燕飛來喙皇孫皇孫死燕喙矢者也成帝時歌謠又曰邪徑敗良田讒口亂善人桂樹花不實黃爵巢其顛故爲人所羨今爲人所憐桂赤色象漢家華不實無繼嗣也王莽自謂黃象黃爵巢其顛也五行志○成帝末年宮中雨一蒼鹿殺而食之其味甚美述異記

哀帝建平元年正月丁未隕石北地十有六光耀雷聲○二年四月乙亥朔御史大夫朱博爲丞相少府趙元爲御史大夫臨延登受策有大聲如鐘鳴殿中郎吏陞者皆聞焉上以問黃門侍郎楊雄



李尋等對曰洪範所謂鼓妖者也師法以爲人君不聽爲衆所惑空名得進則有聲無形不知所從生宜退丞相御史以應天變然雖不退其人自蒙其咎楊雄以爲鼓妖聽失之象也朱博爲人強毅多權謀宜將不宜相恐有凶惡亟疾之怒八月博元坐爲姦謀博自殺元減死論○三年正月癸卯桂宮鴻寧殿災帝祖母傅太后之所居也時傅太后欲與成帝母等號齊尊大臣孔光師丹等執政以爲不可太后皆免官爵遂稱尊號三年帝崩傅氏誅滅○四年夏京師郡國民聚會里巷阡陌設祭張博具歌舞祠西王母又傳書曰母告百姓佩此書者不死不信我言視門樞下當有白髮至秋止

漢書五行志

元壽元年孝元廟殿門銅龜蛇鋪首鳴

哀帝本紀

○哀帝時大司馬董

賢第門無故自壞時賢以私愛居大位賞賜無度嬌嫚不敬大失



臣道見戒不改後賢夫妻自殺家徙合浦

五行志

平帝元始元年二月乙未義陵寢神衣在柙中丙申旦衣在外牀上

平帝本紀

朔方廣牧女子趙春病死歛棺積六日出在棺外自言見夫

死父曰年二十七不當死太守譚以聞五月丁巳朔日食在東井

六月長安女子有生兒兩頭異頸面相鄉四背共勾俱前鄉尻上

有目長二寸所京房易傳曰睽孤見豕負塗厥妖人生兩頭下相

攘善妖亦同人若六畜首目在下茲為亡上正將變更二首下不

一也上體生於下媒瀆也

五行志

○四年冬大風吹長安城東門屋

瓦且盡

平帝本紀

○五年七月己亥高皇帝原廟殿門災盡高皇帝廟

在長安城中後以叔孫通譏復道故復起原廟於渭北非正也是

時平帝幼成帝母王太后臨朝委任王莽將篡絕漢故天象見也

五行志



王莽初長安狂女子碧呼道中曰高皇帝大怒趣歸我國不者九月

必殺汝

主莽傳

○王莽時未央宮中雨五銖錢既而至地悉爲龜兔

述異記

○建國三年池陽縣有小人景長尺餘或乘車馬或步行操

持萬物大小各相稱三日止

漢書王莽傳

天鳳元年七月大風拔木飛北闕直城門屋瓦雨雹殺牛羊○二年二月置酒王路堂公卿大夫皆佐酒是時日中見星訛言黃龍墮苑黃山宮中百姓奔走往觀者有萬數莽惡之問語所從起不能得○三年五月戊辰長平館西岸崩邕涇水不流毀而北行七月辛酉霸城門災十月戊辰王路門朱鳥門鳴晝夜不止○四年八月莽親之南郊鑄作威斗鑄斗日大寒百官人馬有凍死者○五年正月朔北軍南門災

王莽傳

地皇元年七月大風毀王路堂是月杜陵便殿乘輿虎文衣廢藏



在室匣中者出自樹立外堂上良久乃委地武功水鄉民三舍墊  
為池○三年二月霸橋災數千人沃救不滅夏蝗從東方來蜚蔽  
天至長安入未央宮緣殿閣六月殿中鉤盾土山仙人掌旁有白  
頭公青衣郎吏見者私謂之國師公衍功侯喜素善卦莽使筮之  
曰憂兵火莽曰小兒安得此左道是乃予之皇祖叔父子僑欲來  
迎我也

王莽傳

**後漢**

光武先在長安時同舍生疆華自關中奉赤伏符曰劉秀發兵捕不  
道四夷雲集龍鬪野四七之季火為王

後漢書光武本紀

建武二年關中饑人相食

光武本紀

七年九月庚子土入鬼中○十年

閏月庚辰火入輿鬼○十二年九月甲午火犯輿鬼○十三年二

月乙卯火犯輿鬼西北

古今注

○三十年閏月甲午水在東井二十



度生白氣東南指炎長五尺爲彗五月甲子不見凡見三十一日  
水常以夏至放於東井閏月在四月尚未當見是羸而進也東井  
爲水衡水出之爲大小白氣爲喪○三十一年七月戊午火在輿  
鬼一度入鬼中出尸星南半度明年二月二十二日有客星在輿  
鬼東北六尺所滅凡見百一十三日熒惑爲凶衰輿鬼尸星主苑  
亡熒惑入之爲大喪

後漢書  
天文志

明帝永平元年十一月辛未土逆行乘東井北軒轅第二星

古今注

○

十三年閏月丁亥火犯輿鬼爲大喪質星爲大臣誅戮

後漢書  
天文志

章帝建初元年三月戊寅木火在東井

古今注

○七年十月車駕西巡

得白鹿於臨平觀車駕西巡至槐里右扶風禁上美陽得銅器於

岐山似酒尊詔在道晨夕以爲百官熱酒

宋書符  
瑞志

和帝永元元年十一月壬申鎮星在東井○二年正月乙卯土在東



井二月乙亥金在東井

古今注

○五年四月癸巳太白熒惑辰星俱

在東井東井秦地爲法三星合内外有兵九月行車騎將軍事鄧

鴻與度遼將軍朱徵護烏桓校尉任尚中郎將杜崇征叛胡十二

月車騎將軍鴻坐追虜失利下獄死徵崇皆抵罪

後漢書天文志

木在輿

鬼○六年六月丁亥金在東井

古今注

○七年二月戊寅金火俱在

東井爲外兵有死將其九年九月羗反遣執金吾劉尚行征西將

軍事越騎校尉節鄉侯趙世發北軍五校黎陽雍營及邊兵三萬

騎征西羗

後漢書天文志

○十三年正月辛未水乘輿鬼

古今注

○十五年

六月辛酉漢中城固南城門災四月甲子晦日有食之在東井二

十二度

後漢書五行志

○十六年七月庚午水在輿鬼中輿鬼爲死喪

天文

志

元興元年五月癸酉右扶風雍地裂

五行志



安帝永初元年八月戊申客星在東井弧星東井弧皆秦地是時著

反斷隴道是其應也

天文志

○三年三月壬寅熒惑入輿鬼古今注○

四年六月癸酉太白入輿鬼輿鬼為將凶

後漢書天文志

○七年四月丙

申晦日有蝕之在東井一度

五行志

元初元年三月癸酉熒惑入輿鬼○二年九月辛酉熒惑入輿鬼

○三年三月熒惑入輿鬼中七月甲寅歲星入輿鬼○四年正月

丙戌歲星留輿鬼中四月壬戌太白入輿鬼中己巳辰星入輿鬼

中六月丙申熒惑入輿鬼中戊戌犯輿鬼大星○五年三月丙申

鎮星犯東井鉞星五月庚午辰星犯輿鬼質星丙戌太白犯鉞星

○六年四月癸丑太白入輿鬼六月丙戌熒惑在輿鬼中丁卯鎮

星在輿鬼中自永初五年到永寧七年之中太白再入輿鬼熒惑

五入輿鬼鎮星一犯東井鉞星一入輿鬼歲星辰星再入輿鬼凡



五星入輿鬼中皆為死喪熒惑太白甚犯鉞質星為誅戮天文志

延光元年八月戊子陽陵園寢殿火凡災發見於先陵此太子將

廢之象也若曰不當廢太子以自剪則火不當害先陵之寢也五行志

○三年六月辛未扶風言白鹿見雍七月丁酉馮翊言甘露降

安帝本紀左馮翊衙有木連理十月壬午鳳凰集京兆新豐西界槐樹

宋書符瑞志○四年太白入輿鬼中古今注曰四月甲辰入後漢書天文志

順帝永建二年八月乙巳熒惑入輿鬼輿鬼為死喪質星為誅戮天文志

○三年秋七月丁酉茂陵園寢災帝編素避正殿辛亥使太常

王龔持節告祠茂陵順帝本紀

陽嘉三年四月乙卯太白熒惑入輿鬼古今注

永和三年閏月甲寅辰星入輿鬼辰星入輿鬼為大臣有死者○

五年五月己丑晦日有蝕之在東井三十三度東井三輔宿又



與鬼與鬼為宗廟其秋西羌為寇至三輔園陸五行志○六年二

月甲申彗星在東井遂歷與鬼東井與鬼為秦皆羌所攻鈔天文志

○永和年長安雨綿皆白古今注

漢安二年五月丁亥辰星犯與鬼與鬼為大喪後漢書天文志

質帝本初元年三月癸丑熒惑入與鬼四月辛巳太白入與鬼皆為

大喪天文志

桓帝建和元年八月壬寅熒惑犯與鬼質星○二年二月辛卯熒惑

行在與鬼中○三年五月丙申熒惑入東井八月己亥鎮星犯與

鬼中南星熒惑犯與鬼為死喪質星為戮臣鎮星犯與鬼為喪天文志

志四月丁卯晦日有蝕之在東井二十三度五行志

永壽三年四月戊寅熒惑入東井口中為大臣有誅者天文志

延熹元年七月乙巳左馮翊雲陽地裂○三年五月戊申漢中山



崩

五行志

○四年三月甲寅熒惑犯輿鬼質星熒惑犯輿鬼質星大

臣有戮死者

天文志

四月上郡言甘露降

桓帝本紀

六月右扶風地震○

六年七月甲申平陵園寢火○七年三月癸亥隕石右扶風一鄠

又隕石二皆有聲如雷

五行志

八月庚戌熒惑犯輿鬼質星熒惑犯

質星有戮臣○八年五月癸酉太白犯輿鬼質星○九年六月壬

戌太白行入輿鬼七月乙未熒惑行入輿鬼中犯質星太白犯輿

鬼質星有戮臣太白熒惑入輿鬼皆為死喪又犯質星為戮臣

天文志

志

永康元年五月壬子晦日有食之在輿鬼一度

五行志

靈帝建寧二年十月戊戌晦日有蝕之右扶風以聞

五行志

熹平四年夏四月延陵園火六月三輔螟虫為害

五行志

光和二年三月京兆地震

五行志

○三年冬彗星出狼弧

天文志



中平二年七月三輔螟虫為害○中平中長安城西北六七里空樹

中有人面生鬚

五行志

獻帝初平元年三月獻帝初入未央宮翟雉飛入未央宮獲

張璠紀

八

月霸橋災其後三年董卓見殺○二年三月長安宣平城門外屋

無故自壞至三年夏司徒王允使中郎將呂布殺太師董卓夷三

族○四年六月右扶風雨雹如斗

後漢書五行志

華山崩裂

獻帝本紀

右扶風

大風發屋拔木

五行志

興平元年十月長安市門無故自壞至二年春李傕郭汜鬪長安

中催迫劫天子移置催塢盡燒殿城門官府民舍放兵寇鈔公卿

以下

五行志

秋七月三輔大旱自四月至於是月帝避正殿請雨遣

使者洗囚徒原輕繫是歲穀一斛五十萬豆麥一斛二十萬人相

食啖白骨委積九月桑復生樵人得以食

獻帝本紀

○九年十一月有



星孛於東井輿鬼○十七年十二月有星孛於五諸侯周羣以爲西方專據土地者將失土是時漢中太守張魯據漢中二十年秋曹公攻漢中魯降○二十三年三月孛星歷東井五諸侯鋒炎指帝座占曰除舊布新之象也

天文志

後主建興十二年諸葛亮帥大衆伐魏屯於渭南有長星赤而芒角自東北西南流投亮營三投再還往大還小占曰兩軍相當有大流星來走軍上及墜軍中皆破敗之徵也九月亮卒於軍營而退羣帥交惡多相誅殘

宋書天文志

**魏**

明帝青龍二年三月辛卯月犯輿鬼輿鬼主斬殺占曰民多病國有憂五月丁亥太白晝見積三十餘日以晷度推之非秦魏則楚也是時諸葛亮據渭南與司馬懿相持○三年六月丁未填星犯井



鉞戌戌太白又犯之占曰凡月五星犯井鉞悉爲兵災一曰斧鉞  
用大臣誅七月己丑填星犯東井距星占曰填星入井大人憂行  
近距爲行陰其占曰大水五穀不成○四年閏四月乙巳填星犯  
井鉞三月癸卯填星犯東井宋書天文志○青龍中盛修宮室西取長  
安金狄承露槃折聲聞數十里金狄泣於是因留霸城晉書五行志  
少帝正始二年九月癸酉月犯輿鬼西北星西北星主金○三年二  
月丁未月又犯鬼西南星西南星主布帛占曰有錢令一曰大臣  
憂○四年十月十一月再犯井鉞宋書天文志

嘉平元年六月壬戌太白犯東井距星占曰國失政大臣爲亂四  
月辛巳太白犯輿鬼占曰大臣誅兵起○二年三月己未太白犯  
井距星十二月丙申月犯輿鬼○三年四月戊寅月犯東井占曰  
軍將死一曰爲兵七月己巳月犯輿鬼九月乙巳又犯之占曰臣



有亂○四年十一月丁未月犯鬼積尸○五年七月月犯井鉞丙

午月犯鬼西北星占曰國有憂十一月癸酉月犯東井距星占曰

將軍死

晉書天文志

高貴鄉公正元二年二月戊午熒惑犯東井北轅西頭第一星

天文志

甘露元年五月上洛言甘露降

宋書符瑞志

七月乙卯熒惑犯東井鉞

星壬戌月又犯鉞星九月丁巳月犯東井○二年三月庚子太白

犯東井占曰國失政大臣爲亂是夜歲星又犯東井八月壬子歲

星犯井鉞九月庚申歲星逆行乘井鉞占曰逆臣爲亂人君憂○

三年八月壬辰歲星犯輿鬼鎮星占曰斧鑕用大臣誅○四年四

月甲申歲星又犯輿鬼東南星占曰鬼東南星主兵木入鬼大臣

誅

晉書天文志



武帝太始元年十二月鳳凰三見馮翊下邳○八年十月白鹿見扶

風雍州刺史嚴詢獲以獻

宋書符瑞志

咸寧二年六月丙午白龍二見九原井中○三年六月梁州暴水

殺人九月始平郡大水梁州又大水

晉書五行志

○五年十一月甲寅

青龍見京兆霸城

宋書符瑞志

太康元年白雲起霸水三日乃滅

拾遺記

七月木連理生馮翊粟邑

○四年正月木連理生馮翊臨晉十一月癸未白兔見北地富平

十二月嘉禾生扶風雍木連理生扶風○六年梁郡國旱九月白

龍見京兆陰槃○七年四月甘露降京兆杜陵

宋書符瑞志

八月京兆

地震○九年夏扶風始平京兆旱傷麥

晉書五行志

○十年五月白鳥

見京兆長安

宋書符瑞志

白兔見京兆長安六月嘉禾生扶風雍一莖

四穗是歲收三倍

冊府元龜



惠帝元康元年七月雍州大旱殞霜疾疫關中饑米斛萬錢

宋書五行志

○三年六月華陰雨雹深三尺○七年七月秦雍二州隕霜殺禾

大旱疾疫關中饑米斛萬錢因此氏羗反叛雍州刺史解系敗績

而饑疫薦臻戎晉並困朝廷不能振詔聽相賣鬻

晉書五行志

○十年

五月秦雍二州疾疫

宋書五行志

永康二年二月太白出西方逆行入東井占曰國失政臣為亂是

時齊王冏起兵討趙王倫倫滅冏擁兵不朝專權淫奢明年誅死

晉書天文志

文志

永寧元年七月梁州螟

五行志

八月戊午辰星守輿鬼占曰秦有災

天文志

太安二年七月熒惑入東井占曰兵起國亂

宋書天文志

永興二年四月丙子太白犯狼星占曰兵大起九月歲星守東井



并秦分也是時關西諸將攻河間王顥顥奔走東海王迎殺之

天文志

懷帝永嘉三年六月壬子玉龜出灞水

宋書符瑞志

○四年五月秦雍疫

至秋

五行志

○永嘉中秦雍大蝗草木及牛馬毛皆盡又大疾疫兼

以饑饉百姓又為寇賊所殺流尸滿河白骨蔽野

晉書食貨志

愍帝初有童謠曰天子何在豆田中至建興四年帝降劉曜在城東

豆田壁中

五行志

建興三年六月丁卯長安地震是時主幼權傾於下四方雲擾兵

亂不息之應也○四年六月大蝗去歲劉曜頻攻北地馮翊翹先

等悉眾禦之悉為劉曜所破西京遂潰

五行志

建武元年五月癸未太白熒惑合於東井占曰金火合曰爍為喪

宋書天文志



元帝太興二年二月甲申熒惑犯東井占曰兵起貴臣相戮

天文志地

震長安尤甚時曜妻羊氏有殊寵頗預政事陰有餘之徵也

晉書劉曜

載七月甲午歲星熒惑會於東井

天文志

○三年十月己亥熒惑在

東井居五諸侯南躋躅留止積三十日占曰熒惑守井二十日以

上大人憂守五諸侯諸侯有誅者

宋書天文志

○劉曜光初三年西明

門內大奇風吹折經一宿樹撥變為人形髮長一尺鬚眉長三寸

皆黃白色有斂手之狀亦有兩脚着裙之形惟無口鼻每夜有聲

十日而生柯條遂成大樹枝葉甚茂○四年終南山崩長安劉終

於崩所得白玉方一尺有文字曰皇亡皇亡敗趙昌井水竭構五

梁罅酉小衰困囂喪嗚乎嗚乎赤牛奮鞞其盡乎羣臣咸賀以為

勒滅之徵曜大悅齋七日而後受之於太廟大赦境內以終為

端大夫中書監劉均進曰臣聞國主山川故山川崩川竭君為之



舉終南京師之鎮國之所一故而崩其山焉可極言昔三代之季其災也如是今朝臣皆一祥瑞臣獨言非誠上忤聖旨下違衆議然臣不達大理竊所未同何則玉之於山石也猶君之於臣下山崩石壞象國傾人亂皇亡皇亡敗趙昌者此言皇室將爲趙所敗趙因之而昌今大趙都於秦雍而勒跨全趙之地趙昌之應當在石勒不在我也井水竭構五梁者井謂東井秦之分也五謂五車梁謂大梁五車大梁趙之分也此言秦將竭滅以構成趙也罅者歲之次名作罅也言歲馭作罅酉之年當有敗軍殺將之事困謂困敦歲在子之年名元囂亦在子之次言歲馭於子國當喪亡赤牛奮鞞謂赤奮若在丑之歲名也牛謂牽牛東北維之宿丑之分也言歲在丑當滅亡盡無復遺也此其誠悟蒸蒸欲陛下勤脩德化以禳之縱爲嘉祥尚願陛下夕惕以答之書曰雖休勿休願



陛下追蹤周旦盟津之美捐鄙號公夢廟之凶謹歸沐浴以待妖言之誅曜撫然改容御史劾均狂言瞽說誣罔祥瑞請依大不敬論曜曰此之災瑞誠不可知深戒朕之不德朕收其忠惠多矣何

罪之有乎

晉書劉曜載記

永昌元年武功男子蘇撫化為女子上洛男子張盧死二十七日

有盜發其塚者盧得蘇

劉曜載記

明帝大寧元年大雨霖震曜父墓門屋大風飄發其父寢堂於垣外五十餘步有鳳凰將五子翔於故未央殿五日悲鳴不食皆死武

功豕生犬

劉曜載記

○三年四月雍梁州大旱自正月至於是月

元經

成帝咸和二年五月甲申朔日有蝕之在井

晉書天文志

○三年長安自

春不雨至於五月

劉曜載記

○九年三月己亥熒惑入輿鬼犯積尸占

曰兵在西北有沒軍死將四月鎮西將軍雍州刺史郭權歸從尋



咸康元年八月戊辰熒惑入東井占曰無兵兵起有兵兵止○三年八月熒惑入輿鬼犯積尸占曰貴人憂甲戌月犯東井距星占曰國有憂將死○七年四月己丑太白犯輿鬼占曰兵革起八月辛丑月犯輿鬼占曰人主憂

天文志

穆帝永和元年五月辛巳太白晝見在東井占曰爲臣强秦有兵八

月己未月犯輿鬼占曰大臣有誅

晉書天文志

○三年六月月犯東井

距星占曰將死國有憂戊戌月犯五諸侯占曰諸侯有誅○五年

四月丁未太白犯東井占曰秦有兵○六年七月丙寅熒惑犯鉞

星占曰大臣有誅○七年二月乙卯熒惑入輿鬼犯積尸占曰貴

人憂○八年七月壬子歲星犯東井距星占曰內亂兵起八月戊

戌熒惑入輿鬼占曰忠臣戮死○九年八月歲星犯輿鬼東南星



占東南星主兵兵起十二月月在東井犯歲星占曰秦饑民流

宋書

天文志 ○十年正月癸酉填星奄鉞星占曰斧鉞用七月庚午太白

晝見晷度推之災在秦是時桓溫伐苻健破其嶢柳軍

晉書天文志

十

一月月奄填星在輿鬼占曰秦有兵時桓溫伐苻健健堅壁長安

溫退

宋書天文志

三麥不登至關西亦然

晉書五行志

新平有長人見語百

姓張靖曰苻氏應天受命今當太平外面者歸中而安泰問姓名

弗答俄不見新平令以聞健以為妖下靖獄會大雨霖河渭溢蒲

津監寇登得一履於河長七尺三寸人跡稱之指長尺餘文深一

寸健歎曰覆載之中何所不有張靖所見定不虛也赦之○十一

年蝗虫大起自華澤至隴山食百草無遺牛馬相噉毛猛獸及狼

食人行路斷絕健自蠲百姓租稅減膳徹懸素服避正殿

苻健載記

苻健苑子生僭立虎狼大暴從潼關至於長安晝則斷道夜則發屋



不食六畜專以害人

魏書符生傳

僞中書監胡文中書令王魚言於生

曰比有熒惑入於東井井秦之分野於占不出三年國有大喪大

臣戮死願陛下遠追周文脩德以禳之惠和羣臣以成康哉之美

生曰皇后與朕對臨天下亦足以塞大喪之變毛太傅梁車騎梁

僕射受遺輔政可謂大臣也於是殺其妻梁氏及太傅毛貴車騎

尚書令梁楞左僕射梁安

晉書符生載記○按晉書符生僭位改年壽光時永和十三年也綱目通鑑皆

作永和十一年秋九月秦殺其后梁氏及太傅毛貴等今依綱目紀之而并附晉書十三年之說以備考云

○十二年

六月庚子太白晝見在東井

宋書天文志

長安大風發屋拔樹行人顛

頓宮中奔擾或稱賊至宮中晝閉五日乃止

晉書符生載記

升平元年有司奏太白犯東井東井秦之分也太白罰星必有暴

兵起於京師生曰星入井者必將渴耳何所怪乎長安謠曰東海

大魚化為龍男便為王女為公問在何所洛城東東海符堅封也



時為龍驤將軍第在洛門之東太史令康權言於生曰昨夜孛星入於太微遂入於東井兼自去月上旬沉陰不雨迄至於今必有下人謀上之禍生怒以為妖言撲而殺之

符生載記

四月壬子太白入

輿鬼丁亥月奄東井南轅西頭第二星占曰秦地有兵一曰將死其年五月符堅殺符生而立

晉書天文志

○二年二月甲午月犯東井

宋書天文志

○三年六月太白犯東井七月丙戌太白犯輿鬼

晉書天文志

○五年堅僭位五年鳳凰集於東闕

符堅載記

哀帝興寧三年七月庚戌歲星犯輿鬼占曰人君憂

宋書五行志

帝奕太和元年秦雍二州地震裂水泉湧出金象生毛長安大風震

電壞屋殺人

晉書符堅載記

簡文帝咸安二年六月太白犯輿鬼占曰國有憂

宋書天文志

孝武帝寧康元年天鼓鳴有彗星出尾箕太史令張孟言於



滅秦之象時有人於堅光明殿大呼謂堅曰甲申乙酉魚羊食人

悲哉無復遺堅命執之俄而不見晉書符堅載記○三年六月癸卯太白

犯東井占曰秦地有兵宋書天文志符堅建元十二年高陵縣民得大

龜三尺六寸背文負八卦古字堅命作石池養之後苑藏其骨於

太廟其夜廟丞高虜命龜謂之曰我本出將歸江南遭時不遇殞

命秦庭即有人夢中謂虜曰龜三千六百歲而終終必妖興亡國

之徵也未幾為謝元破於淮淝自縊新城浮圖中異苑

太元二年六月長安大風拔符堅宮中樹宋書五行志七月己卯老人

星見○三年七月乙酉老人星見玉海○四年秦大饑綱鑑○七年新

平郡獻玉器初堅即位新平王雕陳說圖識堅大悅以雕為太史

令嘗言於堅曰謹按識云古月之末亂中州洪水大起健西流惟

有天子定八州此即陛下三祖之聖諦也又曰當有草付臣又土



滅東燕破白虜氏在中華在表按圖識之文陛下當滅燕平六州  
願徙汧隴諸氏於京師三秦大戶置之於邊地以應圖識之言堅  
訪之王猛猛以雕爲左道惑衆勸堅誅之雕臨刑上疏曰臣以趙  
建武四年從京兆劉湛學明於圖記謂臣曰新平地古顓頊之墟  
里名曰鷄間此里應出帝王寶器其名曰延壽鼎顓頊有云河上  
先生爲吾隱之於咸陽西北吾之孫有草付臣又土應之湛又云  
吾嘗齋於室中夜有流星大如半月落於此地斯蓋是乎願陛下  
誌之平七州之後出於壬午之年至是而新平人得之以獻器銘  
篆書文題之法一爲天王二爲王后三爲三公四爲諸侯五爲伯  
子男六爲卿大夫七爲元士自此以下考載文記列帝王名臣自  
天子王后内外次序上應天文象戴宮布列玉牒版辭不違帝王  
之數從上元人皇起至中元窮於下元天地一變盡三元而止堅



以雕言有後追贈光祿大夫彗星掃東井自堅之建元十七年四月長安有水影遠觀若水視地則見人至是則止堅惡之上林竹死

晉書苻堅載記

○十年慕容冲進逼長安長安大饑人民相食有群鳥

數萬鳴於長安城上其聲甚悲

魏書苻堅傳

每夜有人周城大呼曰楊

定健兒應屬我宮殿臺觀應坐我父子同出不供汝旦尋而不見人跡城中有書曰古苻傳賈錄載帝出五將久長得先是又謠曰堅入五將山長得堅大信之告其太子宏曰脫如此言天或導予於是遣衛將軍楊定擊冲於城西爲冲所擒堅彌懼付宏以後事將中山公詵張夫人率騎數百出如五將宣告州郡期以孟冬救長安宏尋將母妻宗室數百出奔百僚逃散慕容冲入據長安縱兵大掠死者不可勝紀初秦之未亂也關中土然無火而烟氣大起方數十里中月餘不滅堅每令聽訟觀令百姓有怨者舉煙於



城北觀而錄之長安為之語曰欲得必存當舉煙又為謠曰長鞘

馬鞭擊在股太歲南行當復虜秦人呼鮮卑為白虜慕容垂之起

於關東歲在癸未晉書苻堅載記秦記曰初長安謠曰鳳凰鳳凰止阿房

苻堅遂於阿房城植桐數萬株以待之其後慕容冲入阿房城而

止焉冲小字鳳也宋陳蕭桐譜七月丁巳老人星見玉海○十一年三月

戊申太白晝見在東井六月甲申又晝見於輿鬼占曰秦有兵時

魏姚萇苻登連兵相征不息晉書天文志○十五年沔中諸郡大水宋書

五行志七月壬申有星孛於北河宋書天文志

安帝隆安元年四月丁丑太白晝見在東井秦有兵喪天文志八月熒

惑守井鉞占曰大臣有誅晉書天文志○四年十月梁州有馬生角晉書

五行志

元興元年二月戊子太白犯五諸侯因晝見七月戊寅熒惑在



井犯輿鬼積尸

文志

義熙元年三月太白犯東井占曰秦有兵

天文志

○二年華山郡池

湧沸廣袤百餘步生物皆熟五月乃止

晉書姚興載記

○五年四月甲戌

熒惑犯辰星在井東○六年七月己亥月犯輿鬼占曰國有憂一

曰秦有兵○七年四月辛丑熒惑入輿鬼占曰秦有兵一曰雍州

有災

宋書天文志

時客星入東井所在地震前後一百五十六興公卿

抗表請罪姚興曰災譴之來咎在元首近代或歸罪三公甚無謂

也公等悉冠履復位

晉書姚興載記

○八年七月甲申太白犯填星在東

井占曰秦有大兵己未月犯井鉞十月丁丑填星犯東井占曰大

人憂十二月癸卯填星犯井鉞○九年二月丙午熒惑填星皆犯

東井占曰秦有兵壬辰歲星熒惑填星太白聚於東井從歲星也

熒惑入輿鬼太白犯南河東井秦分十三年高祖定關中熒惑入



輿鬼占曰兵喪太白犯南河占曰兵起後皆有應○十年七月庚

辰熒惑犯井鉞填星犯輿鬼遂守之占曰大人憂宗廟改九月填

星犯輿鬼占曰人主憂宋書天日在東井有白虹十餘丈在南干

日災在秦分秦亡之象晉書天○十一年二月己卯填星入輿鬼

閏月丙午填星又入輿鬼占曰為旱為疫為亂臣六月己未太白

犯東井占曰秦有兵戎寅犯輿鬼占曰國有憂十一月乙未月入

輿鬼而暈占曰主憂財寶出宋書天姚興死之前歲太史令奏熒

惑在匏瓜星中一夜忽然亡失不知所在崔浩曰庚午之夕辛未

之朝天有陰雲熒惑之亡當在此二日之內庚之與未皆主於秦

辛為西夷今姚興據咸陽是熒惑入秦矣後八十餘日熒惑果出

於東井留守盤旋秦中大旱赤地千里昆明池水竭童謡訛言

內誼擾明年姚興死魏書崔浩傳靈臺令張泉又言於興曰熒惑入東



井旬紀而返未餘月復來守心王者惡之宜脩仁虛已以答天譴

興納之正旦興朝羣臣於太極前殿沙門賀僧慟哭不能自勝衆

咸怪焉晉書姚興載記○十三年漢中城固縣水涯有聲若雷旣而岸崩

出銅磬十有二枚五行志○十四年二月癸丑太白犯五諸侯七月

甲辰熒惑犯輿鬼占曰秦有兵丁巳月犯東井占曰軍將死宋書天文

志○按晉書記載機祥皆不紀年今以通鑑綱目所紀約畧其年代爲叙次焉

**宋**按宋齊梁地之在秦者止有漢興商洛漢興漢書爲翼軫分商洛

唐書爲柳張分皆非井鬼正占若陳則並漢興商洛悉非其境魏

收以爲江南僑立雍州以總牧西土遺黎故與井鬼同候其說雖

未足據要之天象元遠或南史紀其變而仍於秦地應其占則天

文之關於井鬼者皆不可缺也今依正史並載之

文帝元嘉七年六月熒惑犯東井輿鬼○八年五月太白犯天關東

井六月庚子熒惑入東井八月乙未熒惑犯積尸十月丙辰月奄

天關東井十年仇池氐寇漢中梁州失戍○九年正月庚午熒惑



入輿鬼三月己丑太白入積尸○十一年閏月戊寅太白犯五諸  
侯己丑月入東井犯太白○十二年七月熒惑犯積尸○十三年  
十一月辛亥歲星犯積尸○十四年正月有星晡前晝見東北維  
在井左右黃赤色大如橘月犯東井四月丁未太白犯輿鬼○十  
五年十一月丁未月犯東井鉞星○二十二年二月金火木合東

井

宋書天文志

孝武帝孝建三年四月戊戌太白犯輿鬼占曰民多疾

天文志

大明二年三月辛未熒惑入東井四月己亥熒惑在東井犯北轅  
第二星東井雍州分○三年四月土犯五諸侯占曰諸侯誅五月  
歲星犯東井鉞占曰斧鉞用大臣誅○四年六月太白犯井鉞占  
曰兵起斧鉞用大臣誅七月歲星犯積尸占曰大臣誅○五年正  
月歲星犯輿鬼積尸占曰大臣誅主有憂財寶散四月太白犯東



井北轅占曰大臣爲亂斧鉞用太白犯輿鬼占曰大臣誅斧鉞用  
人主憂八月熒惑入東井占曰大臣當之十月熒惑入井中占曰  
王者亡地大赦兵起爲饑○六年三月熒惑入輿鬼占曰有兵大  
臣誅天下多疾疫○七年六月太白入東井占曰大臣當之太白  
犯東井占曰大臣爲亂斧鉞用七月熒惑入東井占曰兵起大將  
當之太白犯輿鬼占曰兵起大將誅人主憂財帛出八月熒惑犯  
輿鬼○八年正月月奄輿鬼占曰大臣誅四月太白入東井天文志  
前廢帝永光元年三月庚子月入輿鬼犯積尸輿鬼主斬戮六月庚  
午熒惑入東井東井離州分天文志

明帝泰始二年正月庚子月犯輿鬼占曰將軍死○三年六月甲辰  
月犯東井占曰軍將死熒惑犯輿鬼占曰金錢散又曰不出六十  
日必大赦○四年六月壬寅太白犯輿鬼占曰民大疾死不收其



年普天大疫

天文志

○七年六月十七日太白歲星填星合於東井

占曰改立王公

南齊書天文志

後廢帝元徽五年四月丁巳熒惑犯輿鬼西北星占曰大人憂近期

六十日遠期六月日又曰人君惡之其月丙子太白犯輿鬼西北

星占曰大赦

宋書天文志

順帝昇明二年十月一日熒惑守輿鬼

南齊書天文志

**南齊**

高帝建元四年二月乙亥月犯輿鬼西北星六月戊子熒惑從行入

東井無所犯戊戌熒惑在東井度丁丑熒惑太白同在東井七月

甲戌熒惑從行入輿鬼犯積尸九月二十日月入輿鬼犯積尸十

一月戊辰老人星見南方丙上

南齊書天文志

武帝永明元年五月甲午歲星在東井六月癸酉月犯輿鬼西南星



八月乙丑又犯輿鬼九月癸巳月犯東井北轅西頭第一星○二年三月丁丑月犯東井北轅北頭第一星四月丙申太白從行犯東井鉞星六月丙寅月犯東井轅頭第一星戊辰太白熒惑合同在輿鬼度巳巳太白從行輿鬼度犯歲星八月戊子月犯東井北轅西頭第一星○三年三月壬辰月入東井無所犯六月甲戌太白犯東井北轅第三星在西一尺八月丁酉老人星見南方丙上丙辰月犯東井北轅第二星九月癸未月犯東井南轅西頭第一星十一月戊寅月入東井曠中因蝕三分之一○四年正月癸酉月入東井無所犯乙亥月犯輿鬼二月丁卯月犯東井鉞三月乙未月入東井無所犯五月丙午日暈再重仍白虹貫日在東井度七月辛亥月犯東井八月戊寅月犯東井九月丙午月入東井十一月辛丑月入東井曠中十二月巳巳月犯東井北轅東頭第二



星○五年二月癸亥月犯東井南轅西頭第二星七月丁未月入東井曠中無所犯○六年四月癸丑月犯東井南轅西頭第二星辛酉太白從行在熒惑北三寸爲犯並在東井度甲戌熒惑辰星俱從行入東井曠中無所犯八月壬戌老人星見南方丙上九月丁酉月行入東井閏月壬辰月行入東井十一月乙未月行在東井南轅西頭第二星○七年正月甲寅月入東井曠中無所犯二月辛巳月掩犯東井北轅東頭第一星七月壬戌老人星見南方丙上九月庚申月在東井北轅東頭第一星西北八寸爲犯十二月壬午月在東井北轅東頭第一星北八寸爲犯○八年四月丙申熒惑從行入輿鬼在西北星東南二寸爲犯六月戊子太白從行入東井十月壬午月入東井曠中無所犯○九年二月辛未月入東井曠中無所犯壬申月行東井北轅東頭第一星北九寸爲



犯閏七月戊寅老人星見南方丙上十一月辛未月在東井南轅  
西頭第二星南八寸爲犯又入東井曠中○十年二月庚子熒惑  
從行入東井北轅西頭第一星西二寸爲犯三月癸未熒惑從行  
在輿鬼西北七寸爲犯乙酉熒惑從行入輿鬼五月辛巳太白從  
行入東井在軒轅西第一星東六寸爲犯七月丁丑月在東井北  
轅第二星西南九寸爲犯八月乙酉老人星見甲辰月入東井曠  
中無所犯十月癸亥月入東井曠中無所犯十二月甲午月入東  
井曠中又進北轅東頭第二星四寸爲犯○十一年正月辛酉月  
入東井曠中無所犯二月丁丑太白從行入東井北轅西頭第一  
星東北一尺爲犯四月戊子太白在五諸侯東第二星西北六寸  
爲犯辛丑太白從行入輿鬼在東北星西南四寸爲犯八月辛巳  
熒惑從行入東井在南轅西第一星東北一尺四寸九月己亥月



卷之六

三

入東井曠中無所犯丙寅老人星見南方丙上十一月丁巳熒惑逆行在五諸侯東星北四寸爲犯辛酉月行在東井鉞星南八寸又在東井南轅西頭第一星南五寸並爲犯進入井中十二月辛巳月入東井曠中又入東井北轅西頭第二星南六寸爲犯天文志鬱林王隆昌元年三月辛亥月在東井北轅西頭第二星東七寸爲犯乙丑熒惑從行入輿鬼西北星東一寸爲犯癸酉熒惑從行在輿鬼積尸星東北七寸爲犯六月丁卯月入東井南轅西頭第一星東北七寸爲犯天文志

**梁**

武帝天監四年八月庚子老人星見占曰老人星見人主壽昌自此

後每年恒以秋分後見於參南至春分而伏武帝壽考之象云○

七年九月己亥月犯東井占曰有水災

隋書天文志



中大通元年閏月壬戌熒惑犯輿鬼積尸占曰有大喪有大兵

軍殺將

天文志

文帝天嘉二年六月丙戌熒惑犯東井七月乙丑熒惑入鬼中戊辰

熒惑犯斧質○三年七月太白犯輿鬼

隋書天文志

宣帝大建十一年四月己丑歲星太白辰星合於東井

天文志



太祖天興五年三月戊子太白犯五諸侯晝見經天犯五諸侯所以

興霸行也四月辛丑月掩辰星在東井月爲陰國之兵辰象戰鬪

占曰所直野軍大起戰不勝亡地家臣死冬十月帝伐秦師於蒙

坑大敗之遂舉乾壁關中大震其上將姚平赴水死

魏書天文志

天賜六年四月火犯水於東井其冬赫連氏攻安定秦主興自將



救之自是侵伐不息

天象志

太宗永興二年七月月犯輿鬼占曰亂臣在內○四年六月癸巳金木合於東井七月甲申金犯土於井占曰其國內兵有白衣之會十一月土犯井十二月癸卯土犯鉞土主疆理之政存亡之機也是爲土地分裂有戮施之君徵在秦邦至五年二月丙午火土皆犯井占曰國有兵喪之禍主出走是月壬辰歲填熒惑太白聚於井將以建霸國之命也其地君子憂小人流又自三年四月至五年三月熒惑三千鬼主命者將天而國徙焉是時雍州假王霸之號者六國而赫連氏據朔方之地尤爲強暴薦食關中秦人奔命者殆路間歲姚興薨而難作於內明年劉裕以晉師伐之秦師連戰敗績執姚泓以歸戕諸建康旣而遺守內攜長安淪覆焉○五年十二月甲辰月三暈東井

天象志



神瑞元年二月填星入東井犯天尊旱祥也天象若曰土久其

水源將壅焉施於天尊所以福矜寡之萌也八月庚寅至二年三

月填星再犯輿鬼積尸土爰稼穡鬼爲物之精氣是爲稼穡潛耗

人將以饑而死焉一曰大旱又鬼主秦旱在秦邦

天象志

泰常二年十一月癸未月犯東井南轅西頭第一星占曰諸侯貴

人苑一曰有水○三年正月戊申月犯輿鬼積尸已酉月犯耀星

占曰女主憂五月癸亥月犯太白於東井七月丁巳月犯東井

天象

志

世祖始光三年五月洛州獻白兔

靈徵志

神龜三年六月火犯井鬼占曰秦憂兵亂有死君又旱饑之應九

月帝用崔浩策行幸統萬擊赫連定於平涼十二月克之悉定三

秦地○四年金火入東井明年五月火又犯鬼○五年正月庚午



火入鬼占曰秦有苑君

天象志

延和三年閏月戊寅金犯五諸侯占四滑起官兵起亂己丑月入井犯太白占曰兵起合戰秦邦受之七月上幸隰城詔諸軍討山胡白龍入西河九月克之伏誅者數千人

天象志

太延二年正月月犯東井占曰將相苑八月丁亥木入鬼守積尸

十一月辛亥又犯鬼○三年正月壬午有星晡前見在井左右色

黃大如橘魏師之應也○四年四月己酉華山崩華山西鎮也鎮

傾而國從之十一月丁未月犯東井占曰將軍苑

天象志

真君二年七月壬寅填星犯鉞○六年二月太白熒惑歲星聚於

東井占曰二星合是爲驚立絕行其國內外有兵與喪改立王公

九月盧水胡蓋吳據杏城反僭署百官諸虜皆響從關內大震十

一月將軍叔孫拔敗吳師於渭北

天象志



高宗太安四年三月月犯五諸侯○五年二月熒惑入東井占曰

兵饑疫大臣當之六月太白犯鉞占曰兵起更正朔

天象志

和平元年正月丁未歲犯鬼歲星入君也是爲君有喪事四月太

白犯東井井秦分雍州有兵亂二年詔諸將討雍州叛氏大破之

○二年三月熒惑入鬼是謂稼穡不成且曰萬人相食六月太白

犯東井七月火入井九月火犯積尸占曰貴人憂之斧鉞用○五

年三月庚子月入輿鬼積尸六月火入井占曰大臣憂斧鉞用○

六年四月太白犯諸侯占曰有專殺諸侯者

天象志

顯祖天安元年六月熒惑犯輿鬼占曰旱饑疾疫金革用其後東平

王道符擅殺副將及雍州刺史據長安反詔司空和其奴討滅之

甲辰月犯東井十月癸巳月掩東井

天象志

皇興元年正月丙辰月犯東井北轅東頭第三星四月壬寅太白



犯鬼八月辛酉月蝕東井南轅第二星占曰有將死○五年七月

辛巳月犯東井

天象志

高祖延興元年十二月乙巳鎮星犯井○二年正月丙子月犯東井

庚子又如之占曰天下有變令貴人多死者

天象志

二月白雀見於

扶風郡

靈徵志

承明元年九月京兆民獻玉璧一雙文色炳煥王者賢良美德則

至

靈徵志

太和元年二月月在井暈

天象志

五月統萬鎮地震有聲如雷六月

雍州獻玉印是月長安鎮獻玉印一上有龜紐下有文字色甚鮮

白有殊常玉雍州周城縣獻白兔○二年七月壬戌雍州赤風

靈徵

志

九月火犯鬼占曰主以浮佚失政相死之

天象志

十一月洛州獻

白鵠

靈徵志

○三年正月壬子月暈東井占曰有赦十月大赦天下



癸丑日暈東西有珥有佩戟一重北有偃戟四重後有白氣貫日

珥狀如車輪京師不見雍州以間天象志統萬鎮獻白雉七月雍州

大霜禾豆盡苑靈徵志○四年正月丁未月暈東井○五年二月甲

辰白暈侵東井西河輿鬼天象志○六年七月雍州大水野畝害稼

○七年六月甲子東雍州地震有聲靈徵志○八年止月辛巳月暈

東井天象志四月雍州暴雨蝗靈徵志○九年正月月暈東井北河占

口水戌申月犯東井占曰貴人苑一曰有水天象志四月雍州隕霜

靈徵志○十一年二月癸亥月犯東井七月丁未月入東井甲子月

入東井是歲月三入東井金又犯之占曰陰陽不和不為水患且

大旱○十二年四月癸丑月火金會於井甲戌火水又俱入井皆

雨暘失節萬物不成候也且曰諸侯貴人多苑是歲兩雍旱饑十

一月己未月犯東井○十三年正月甲寅月入東井九月庚申月



入東井十二月壬午月入東井○十四年十月壬午月入東井○十五年十一月辛未月入東井○十六年八月甲辰月入東井十月癸亥月入東井○十七年二月丁丑太白犯井辛丑又犯鬼是爲兵祥雍州也八月辛巳熒惑入井占曰兵革起八月辛丑月犯輿鬼甲午月入東井十一月辛酉月犯東井前星○十八年六月丁卯月入東井○十九年六月庚申金木合於井七月火犯井天象

志○二十三年正月華州獻白麋靈徵志

世宗景明元年四月丙子夏州隕霜殺草六月雍州大雨雹殺麋鹿八月乙亥雍夏州頻暴風隕霜靈徵志○二年正月甲辰月暈井占

曰貴人犯大赦三月戊午填星在井犯鉞相去二寸占曰人君有戮死者○三年正月填星逆行守井北轅西星皆大臣更政立君之戒也二月丁酉有流星起東井至北極而滅東井雍州西君之



分既而西君錫命是歲七月月暈東井占曰旱大赦天象志九月丙

辰函岐梁東秦州暴風昏霧拔樹發屋靈徵志十一月己巳月蝕井

盡乙未月暈井鎮星占曰兵起四年氏反行梁州事楊椿左將軍

羊社大破之○四年正月月暈東井天象志三月壬戌雍州隕霜殺

桑麥七月夏州獻黑兔靈徵志壬申月犯東井占曰旱有大赦天象志

九月梁州上言犬豕交靈徵志

正始元年正月戊戌月暈東井南河北河輿鬼天象志六月夏州隕

害稼懷朔鎮隕霜七月戊辰東秦州隕霜東秦州暴風拔樹發屋

○二年五月雍州獻蒼烏六月雍州又獻蒼烏七月辛巳函岐二

州隕霜○三年七月夏州獻白鳩十二月雍州獻白雀○四年三

月乙丑函州頻隕霜靈徵志

永平元年三月乙酉岐函二州隕霜六月洛州獻白鳩靈徵志○二



年三月火入鬼距積尸五寸積尸人之精爽而炎氣加之疫祥也

四月乙丑金入鬼去積尸一寸又以兵氣干之強死之祥也踰逼

者事甚鬼主驕亢之戒故金火薦災其人以儆而懼之○三年八

月火犯積尸占曰貴人死又饑疫祥也天象志十一月夏州言橫風

山木連理靈徵志○四年八月癸丑月掩輿鬼天象志

延昌元年二月庚午月暈東井輿鬼十月癸酉月暈東井○三年

二月乙酉月暈東井占主赦天象志○四年正月癸丑華州地震閏

月岐州獻白雉九月雍州上言鄠縣木連理十二月洛州上言魏

興太守常矯家黃雌鷄頭上肉角大如棗長寸三分角上生聚三

長寸半靈徵志

肅宗熙平元年十二月甲辰月暈東井天象志○二年正月金出岐州

橫水縣赤粟谷四月華州獻白雀靈徵志十月甲辰月暈東井占



天下大饑大赦十一月戊戌月暈東井天象志

神龜元年八月雍州獻三足鳥靈徵志○二年二月丙辰月在井占

曰有相苑天象志六月夏州上言山鹿縣木連理靈徵志

正光元年沃野鎮馬爲虫入耳死者十四五虫似蝗大如檮靈徵志

四月庚戌金火合於井○二年十一月己酉月在井蝕天象志○三

年二月夏州獻白雉靈徵志○四年正月戊戌月暈東井南河天象志

○五年二月庚寅月暈東井占曰兵起天象志

孝昌元年春隕星於岐如雨五月雨雹傷禾靈徵志十二月火入鬼

占曰大賊在大人之側后以淫佚失政又秦分也○三年正月癸

酉月在井暈兩河天象志

莊帝永安二年閏月熒惑入鬼犯積尸占曰兵起西北有鈇鉞之誅

十月辛亥月暈井占曰兵起大赦○三年三月万俟醜奴遣其大



行臺尉遲菩薩寇岐州大都督賀拔岳可朱渾道元大破之四月

大赦天下九月庚寅月暈井

天象志

節閔帝普泰元年十月癸丑月暈東井占曰有赦

天象志

文帝大統三年關中饑

周書太祖本紀

東魏孝靜帝天平四年十二月梁州獻白雉

冊府元龜

元象元年二月洛州上言木連理

魏書靈徵志

十一月庚午月在井暈

東井南北河占曰有赦

天象志

八月東雍州獻嘉禾

靈徵志

○三年六

月太白入東井占曰秦有兵大臣當之先是行臺侯景司徒高昂

圍金墉西帝及宇文泰自將救之是月陳於河陰泰以中軍合戰

大克司徒高昂死之既而左右軍不利西師由是敗績斬將二十

餘人降卒六萬是月西帝太傅梁景獻據長安反關中大震

伏誅

天象志



興和元年二月壬子火犯井占曰秦有兵亂貴人當之四月又入  
鬼又兵喪之祥也○三年春正月辛巳月暈東井占曰大赦武定  
元年正月大赦改元○四年七月壬午火木合於井相去一尺天象  
志

武定三年五月梁州獲白雀○四年四月梁州獻白鳥靈徵○五

年正月乙巳月犯東井占曰大赦五月丁酉大赦天下天象  
志

**北齊**

按高氏分據河北本無秦地則井鬼星變無關於北齊分野矣但為北周諸書所不載故並錄之以補其缺

文宣帝天保九年二月熒惑犯鬼質占曰斧質用有大喪○十年六

月庚子填星犯井鉞占曰君有戮死者大臣誅斧鉞用隋書天文志

孝昭帝皇建三年七月乙丑熒惑入鬼中戊辰犯鬼質占曰有大喪

天文志

武成帝河清元年七月乙亥太白犯輿鬼占曰有兵謀誅大臣斧質



用天文志

後主天統四年六月彗星見東井占曰大亂國易政○五年五月甲午熒惑犯鬼積尸占曰大臣誅兵大起斧質用有大喪天文志

**周**

孝閔帝元年春正月槐里獻赤雀四五月巳酉槐里獻白鷦周書閔帝本紀

辛亥熒惑犯東井北端第二星占曰其國亂又曰大旱隋書天文志

明帝二年三月戊申長安獻白雀六月長安獻白鳥周書明帝本紀六月庚

子填星犯井鉞占曰傷成於鉞隋書天文志冬十月長安獻白兔周書明帝

本紀

武帝保定元年七月熒惑入輿鬼犯積尸武帝本紀○二年七月乙亥太

白犯輿鬼隋書天文志○五年十一月岐州上言一角獸見周書武帝本紀

天和二年七月梁州上言鳳凰棲於楓樹群鳥列侍以萬數周書



五月己丑歲星與熒惑合於井宿相去五尺井爲秦分占曰其國  
有兵爲饑旱大臣匿謀下有反者若亡地○三年三月己未太白  
犯井北轅第一星占曰將軍惡之其七月壬寅隋公楊忠薨四月  
辛巳太白入輿鬼犯積尸占曰大臣誅又曰亂臣在內有屠城六  
月甲戌彗星見東井長一丈上白下赤而銳漸東行至七月癸卯  
在鬼北八寸所乃滅占曰爲兵國政崩壞又曰將軍死大臣誅○  
四年五月癸巳熒惑犯輿鬼甲午犯積尸占曰午秦也大臣有誅  
兵大起後三年太師晉國公宇文護以不臣誅隋書天文志○五年七  
月鹽州獻白兔周書武帝本紀○六年四月己卯熒惑犯輿鬼占有兵隋書

天文志

建德元年七月丙午辰星太白合於井相去七寸占曰其下之國  
必有重德致天下天文志九月庚申扶風掘地得玉盃以獻○二年



二月壬戌熒惑犯輿鬼入積尸

周書武帝本紀

癸亥熒惑掩輿鬼西北星

占曰賊在太人側大臣有誅

隋書文帝志

三月己卯皇太子於岐州獲

二白鹿以獻詔答曰在德不在瑞

周書武帝本紀

關中大蝗

隋書五行志

○三

年七月京師連雨三旬九月雍州獻蒼烏○五年三月庚子月犯

東井第一星

周書武帝本紀

六月庚午熒惑入鬼占曰有喪旱其七月京

師旱

隋書文帝志

○六年青城門無故自崩青者東方色春宮之象也

時皇太子無威儀禮節青城門無故自崩者皇太子不勝任之應

帝不悟明年太子嗣位果為無道周室危亡實自此始

五行志

宣政元年六月壬午癸丑木火金三星合在井占曰其國霸又曰

其國外內有兵喪改立王侯

天文志

宣帝大象元年四月戊子太白歲星辰星合在井占曰是謂驚立是

謂絕行其國內外有兵喪改立王公又曰其國可霸脩德者強



德受殃周自宣政元年熒惑太白從歲星聚東井大象元年四月

太白歲星辰星又聚東井東井秦分隋以后族興於秦地之象天文

志六月咸陽有池水變為血周書宣帝本紀

**隋**

文帝開皇初同州得石龜文曰天子延千年大吉隋書王邵傳 ○元年二

月甲子即帝位於臨光殿是日京師慶雲見三月辛巳長安獲白

雀宣仁門槐樹連理眾枝內附文帝本紀 盤屋獻連理樹植之宮庭冊府

元龜 ○二年二月涇陽獲毛龜京師醴泉出冊府元龜 京師雨土京房易

飛侯曰天雨土百姓勞苦而無功其時營都邑後起仁壽宮頽山

堙谷丁匠死者大半隋書五行志 ○四年關內饑文帝本紀 四年以後京師

頻旱時遷都龍首建立宮室百姓勞弊亢陽之應也 ○六年七月

京師雨毛如髮尾長者三尺餘短者六七寸京房易飛侯曰天雨



毛其國大饑時關中旱米粟踴貴

五行志

○八年二月庚子填星入

東井占曰填星所居有德利以稱兵其年大舉伐陳克之

天文志

○

十四年五月辛酉京師地震關內諸州旱八月辛未關中大旱人

饑上率戶口就食於洛陽

文帝本紀

○十六年神雀降含章殿闥

玉海

○

開皇中掖宮庭每夜有人來挑宮人宮司以聞帝曰門衛甚嚴何

從而入當是妖精耳戒宮人曰若逢但斫之其後有物如人夜來

登牀宮人抽刀斫之若中枯骨其物落牀而走宮人逐之因入池

而沒明日帝令涸池得一龜徑尺餘其上有刀迹殺之遂絕龜者

水居而靈陰謀之象晉王諂媚宮掖求嗣之應云

隋書五行志

○十七

年有群鹿入殿門

續元經

大興城西南四里有袁村設佛會有老翁

皓首白裙襦衣求食而去衆莫識追而觀之行二里許不復見但

有一陂中有白魚長丈餘小魚從者無數人爭射之剖其腹得鰕



飯始知此魚向老翁也後數日漕暴溢人皆溺死○二十年十一月京都大風發屋拔樹秦隴壓死者千餘人地大震鼓皆應淨刹寺鐘三鳴佛殿門鎖自開銅象自出戶外鐘鼓自鳴者近鼓妖也○開皇末渭南有人寄宿他舍聞二豕對話其一曰歲將盡阿爺明日殺我供歲何處避之一答曰可向水北姊家因相隨而去天將曉主人覓豕不得意是宿客而詰之宿客言狀主人如其言而得豕其後蜀王秀得罪帝將殺之平樂公主每匡救得全後數年而帝崩歲盡之應開皇末渭南有沙門三人行頭佗法於場圃之上夜見大豕來詣其所小豕從者十餘謂沙門曰阿練我欲得賢聖道然負他一命言罷而去賢聖道者君上之所行也皇太子勇當嗣業行君上之道而被囚廢之象也一命者言爲煬帝所害開皇末高祖於宮中埋二小石於地以誌置牀之所未幾變爲玉劉



向曰王者至貴也賤將為貴之象及大業末盜皆僭名號

隋書五行志

仁壽元年五月壬辰驟雨震雷大風拔木宜君湫水移於始平

文帝

本紀○二年四月岐雍地震京房易飛侯曰地動以夏四月五穀不

熟人大饑蓋屋人以楊木為屋梁生三條長二尺京房易傳曰妃

后有顓木仆反立斷枯復生獨孤后專恣之應○三年梁州就谷

山崩洪範五行傳曰崩散落背叛不事上之類也梁州為漢地明

年漢王諒舉兵反○四年有人長數丈見於應門其迹長四尺五

寸其年帝崩○仁壽中仁壽宮及長城之下數聞鬼哭獻后及帝

相次而崩於仁壽宮

五行志

煬帝大業十一年扶風有馬生角長數寸○十二年顯陽門災舊名

廣陽則帝之姓名也國門之崇顯號令之所由出也時帝不遵法

度驕奢荒怠裴蘊虞世基之徒阿諛順旨掩塞聰明宇文述以讒



邪顯進忠諫者咸被誅戮天戒若曰信讒害忠則除廣陽也五在志

長安城禁苑內一大樹冬月雪中忽花葉茂盛及彫落結實其子

光明燦爛如火之明焉數日皆化為紅蛺蝶飛去明年高祖自唐

國入長安瀟湘錄

恭帝義寧二年麟遊太守司馬武獻羊羔生而無尾時議者以謂楊

氏子孫無後之象隋書五行志三月丙午熒惑入東井占曰大人憂唐書

天文志

**唐**

高祖武德元年五月隴州獻嘉麥七月京師慶雲見冊府元龜丙午填星

太白辰星聚於東井關中分也唐書天文志十一月藍田玉山南嶺有

樹連理十二月麟州獻芝草一株紫莖黃蓋是年新豐鸚鵡谷水

清代傳云此水清天下平開皇之初暫清尋濁至是復清冊府元龜○



二年正月麟州獻白鹿

冊府元龜

三月丙申填星太白復聚於東井九

月庚寅熒惑守五諸侯

唐書天文志

十月乙未京師地震陰盛而反常

則地震故其占為臣強為后妃專恣為小人道長為寇至為叛臣

○三年二月丁丑京師西南有聲如崩山近鼓妖也說者以為人

君不聰為眾所惑則有聲無形不知所從生夏旱至於八月乃雨

五行志

○四年二月白狐見元武門○五年正月梁州野蠶成繭百

姓得而用之

冊府元龜

○六年秋關中久雨少陽曰暘少陰曰雨陽德

衰則陰氣勝故常雨

唐書五行志

七月癸卯熒惑犯輿鬼西南星占曰

大臣有誅

天文志

○七年秋關內旱

五行志

閏四月十三日長安古城

鹽渠水中生鹽色紅白而味甘狀如方印

會要

萬年縣言甘露降九

月丹州言河水清○八年四月赤雀巢於殿門○九年正月西華

獻芝草異莖同蓋

冊府元龜

三月順天門樓東柱已傾毀而自起占曰



木仆而自起國之灾

唐書五行志

四月甘露降於中華殿之桐樹凝注

如氷霰以示羣臣

冊府元龜

五月太白晝見六月丁巳經天巳未又經

天在秦分巳卯歲星辰星合於東井占曰爲變謀

唐書天文志

納義門

獲白鹿一巳卯涇陽縣生嘉禾異畝同穎九月麟州言麟見

冊府元龜

太宗貞觀元年關內饑

唐書五行志

閏三月甘露降於長安縣○二年三

月宜州言白狼見六月長安縣獻嘉禾

冊府元龜

京畿旱蝗太宗在苑

中掇蝗祝之曰人以穀爲命百姓有過在予一人但當蝕我無害

百姓將吞之侍臣懼帝致疾遽以爲諫帝曰所異移灾朕躬何疾

之避遂吞之是歲蝗不爲灾

唐書五行志

九月有白雀巢於寢殿槐上

合歡如鼓腰左右稱賀命毀其巢縱鵲於野外

通鑑

○三年四月甘

露降於雍州

冊府元龜

乙丑幽州言麟見

玉海

秋隴州水○四年正月癸

巳武德殿北院火

唐書五行志

三月赤雀見於萬年四月甘露降於萬



年縣

冊府元龜

關中大稔

太宗實錄

秋丹延等州雨雹

唐書五行志

○六年四月

甘露出於丹霞殿之西

冊府元龜

十月乙丑京師地震

唐書五行志

○九年

五月萬年縣獲白雀

冊府元龜

十二月京師蒼烏見

玉海

○十年二月白

鹿見於京之冷泉谷

冊府元龜

關內大疫

唐書五行志

○十一年二月癸未

熒惑入輿鬼占曰賊在大人側

天文志

四月甲子雷震乾元殿前槐

樹震耀天之威怒以象殺戮槐古者三公所樹也

五行志

五月麟見

京師之後苑

冊府元龜

○十二年六月辛卯熒惑入東井占曰旱

唐書五行

志

○十三年三月壬寅雲陽石燃方丈晝則如灰夜則有光投草

木則焚歷年乃止是火失其性而沴金也

五行志

六月太白犯東井

北轅井京師分也

天文志

○十四年七月白龍見於富平○十五年

三月乙酉安禮門御榻產芝五莖六月庚子商州言慶雲見○十

六年七月朔鄜州言白龍見九月金州言青龍見

冊府元龜

○十七年



四月立晉王爲太子有青氣繞東宮殿始冊命而有祲不祥

唐書五行

志芝草生於太廟一十四莖爲龍鳳形

玉海

有雄雉飛集東宮顯德

殿前太宗問羣臣曰頃來頻有雉集是何祥也諫議大夫褚遂良

曰昔秦文時有童子化爲雉雌者鳴於陳倉雄者鳴於南陽童子

言曰得雄者王得雌者霸文公遂以爲寶鷄祠漢光武得雄遂起

南陽而有四海陛下舊封秦王故雄雉見於秦地既古來將爲祥

貺所以表彰明德太宗曰立身之道不可無學遂良所對深爲可

重五月雍州獻三足鳥己未華平出於元武門之池閏六月丹州

獻白鹿

冊府元龜

己卯朔日有食之在東井十六度京師分也

唐書天文志

司農寺有豕生子一首八足自頸分爲二

五行志

七月鄜州言景星

見

冊府元龜

民訛言官遣棖棖殺人以祭天狗云其來也身衣狗皮鐵

爪每於闇中取人心肝而去於是更相震怖每夜驚擾皆引弓劍



自防無兵器者剡竹爲之郊外不敢獨行太宗惡之令通夜開諸

坊門宣旨慰諭月餘乃止

唐書五行志

○十八年五月太白辰星合於

東井占曰爲兵謀十九年六月丙辰太宗征高麗次安市城太白

辰星合於東井史記曰太白爲主辰星爲客爲蠻夷出相從而兵

在野爲戰

天文志

十月老人星見山南道獻木連理交錯玲瓏有同

羅木一丈之幹並枝者二十餘所

玉海

○二十年十一月雍州言甘

樹一株有十八處連理李樹生紫芝光生○二十一年七月綏州

言慶雲見八月綏州言慶雲見○二十二年正月玉華宮李樹連

理

冊府元龜

五月乙巳鎮星守東井占曰旱

唐書天文志

九月邠州大疫詔

醫療之

冊府元龜

○二十三年三月甲弩庫火

唐書五行志

高宗永徽元年二月己丑熒惑犯東井占曰旱四月己巳月犯五諸

侯熒惑犯輿鬼占曰諸侯凶

天文志

京畿雍同等州旱隍六月祈



渭南大雨零口山水暴出漂廬舍○二年延綏等州霜殺稼五行志

○三年二月己丑熒惑犯五諸侯天文志○四年八月己亥隕石於

同州馮翊十八光耀有聲如雷近星隕而化也庶民惟星在上而

隕民去其上之象一曰人君爲詐妄所蔽則然○五年五月丁丑

夜大雨麟遊縣山水衝萬年宮元武門入寢殿衛士有溺死者七

月辛巳萬年宮有小鳥如雀子生子大如鴉鳩十二月乙巳尚書

司勳庫火○六年六月商州大水五行志七月己丑熒惑入輿鬼天文志

志八月京城大雨五行志

顯慶元年四月丁酉太白犯東井北轅占曰秦有兵天文志○二年

五月庚寅有五龍見於岐州之皇后泉○三年長孫無忌第有大

鼠見於庭出入無常後忽然死五行志

龍朔元年五月甲子晦日有蝕之在東井二十七度○三年六月



乙酉太白入東井占曰君失政大臣有誅天文志十二月詔以舍元

殿前琅臺閣內並觀麟改來年正月為麟德元年冊府元龜

麟德二年三月戊午熒惑犯東井四月壬寅熒惑入輿鬼犯質星唐書

天文志六月鄜州大水壞居人廬舍五行志

乾封元年八月乙巳熒惑入東井天文志

總章元年冬京師旱饑五行志○二年六月戊申朔日蝕在東井二

十九度天文志諸州四十餘饑關中尤甚五行志

咸亨元年四月庚午雍州大雨雹五行志癸卯月犯東井占曰人主

憂六月壬寅朔日有蝕之在東井十八度七月壬申熒惑入東井

占曰旱天文志八月以天下四十餘州旱及霜重百姓饑乏關中尤

甚詔雍同華蒲絳五州百姓乏絕者聽於興鳳梁等州逐糧冊府元龜

○二年四月戊子大雨雹震電大風折木落則天門鵠尾三〇〇



年八月乙酉大風落太廟鴟尾唐書五行志○五年六月壬寅太白入

東井天文志

上元三年七月丁亥有彗星於東井指北河長三尺餘東北行光

芒益盛長三丈掃中台指文昌九月乙酉不見東井京師分中台

文昌將相位兩河天闕也天文志

儀鳳二年正月庚辰京師地震高宗本紀○三年五月丙寅高宗在九

成宮霖雨大寒兵衛有凍死者五行志

調露初京城民謠有側堂堂撓堂堂之謠太常丞李嗣真曰側者

不正撓者不安自隋以來樂府有堂堂曲再言堂者唐再受命之

象○元年秋關中饑八月邠州霜○二年夏豐州河清○四年延

州霜殺草五行志

永隆初長安獲女魃長尺有二寸其狀怪異是歲秋不雨至於明



年九月

五行志

○元年五月癸未熒惑犯輿鬼

天文志

○二年七月雍

州大風害稼關中早霜大饑九月萬年女子劉凝靜衣白衣從者

數人升太史令廳問比來有何災異令執之以聞是夜彗星見太

史司曆候王者所以奉若天道恭授民時者非女子所當問

五行志

永淳元年三月京畿蝗關中及山南州二十六饑京師人相食五

月關中旱六月雍岐隴等州蝗乙亥京師大雨平地水深數尺

五行

志

九月庚戌熒惑入輿鬼犯質星

天文志

冬大疫兩京死者相枕於

路十月甲子京師地震

高宗本紀

十一月熒惑復犯輿鬼去而復來是

為勾已

天文志

永淳中勝州兎害稼千萬為群食苗盡兎亦不復見

五行志

中宗即位金鷄竿折鷄竿所以肆赦始發大號而鷄竿折不祥

五行志

睿宗文明初新豐有馬生駒二首同項各有口鼻生而死又咸陽北



馬生石大如升上微有綠毛皆馬禍也

五行志

光宅初岐州刺史崇真之子橫杭等夜宴忽有氣如血腥

五行志

武后垂拱元年四月癸未辰星犯東井北轅辰爲廷尉井爲法令失

道則相犯也

天文志

○二年九月乙巳雍州新豐縣露臺鄉大風雨

震電有山湧出高二十丈有池周三百畝池中有龍鳳之形禾麥

之異武后以爲休應名曰慶山俞文俊上言天氣不和而寒暑隔

人氣不和而贅疣生地氣不和而堆阜出今陛下以女主居陽位

反異剛柔故地氣隔塞山變爲災陛下以爲慶臣以爲非慶也宜

側身脩德以答天譴不然恐災禍至后怒流於嶺南

五行志

○三年

七月乙亥京師地震

武后本紀

○四年六月朔日有蝕之在東井二十

七度京師分也

天文志

七月戊午京師地震

五行志

永昌中華州赤水南岸大山晝日忽風昏有聲隱隱如雷頃之漸



移東數百步擁赤水壓張村民三十餘家山高二百餘丈水深三十丈坡上草木宛然金縢曰山徙者人君不用道祿去公室賞罰不由君佞人執政政在女主不出五年有走王

五行志

天授元年五月檢校內史宗秦客拜日無雲而雷近鼓妖也

五行志

長壽二年正月大雪質明而晴俗云元日有雪則可穀豐文昌左

丞姚璿對曰雪爲五穀之精以其協和則年穀大穰

玉海

十月萬象

神宮側檉杉皆變爲柏柏貫四時不改柯易葉有士君子之操檉

杉柔脆小人性也象小人居君子之位

唐書五行志

延載元年九月內出梨華一枝示宰相萬木搖落而生華陰陽黷

也傳曰天反時爲災又近常燠

五行志

證聖元年正月丙申夜明堂火武太后欲避正殿徹樂宰相姚璿以爲火因人非天災不宜貶損后乃御端門觀酺引建章故事復



作明堂以厭之是歲內庫灾燔二百餘區

五行志

神功元年二月庚子有人

八端門又入則天門至通天宮闈及伏

衛不之覺綏州雹

五行志

聖曆二年熒惑入輿鬼

天文志

久視元年夏關內旱

五行志

長安初醴泉坊太平公主第井水溢流○二年關內大旱熒惑犯

五諸侯渾儀監尚獻甫奏臣命在金五諸侯太史之位火克金臣

將死矣武后曰朕爲卿禳之以獻甫爲水衡都尉水生金又去太

史之位卿無憂矣是秋獻甫卒

五行志

○三年八月京師大雨雹人

畜有凍死者

白孔六帖

中宗神龍元年四月壬子雍州同官縣大雨雹殺鳥獸大雨水湮沒

民居五百餘家○二年長安城中徃徃見水影昔苻堅之敗也長



安嘗有是是冬不雨至於明年五月京師旱饑

唐書五行志

○三年五

月戊戌太白入輿鬼占曰大臣有誅六月丁卯朔日有食之在東

井二十八度京師分也

天文志

神龍中渭水中有鰕蟆大如鼎里人

聚觀數日而失是歲大水

五行志

景龍元年京師疫○二年岐州郿縣王尚賓家有苦蕒菜高三尺

餘上廣尺餘厚三分近草妖也○三年內出蒜條上重出蒜蒜惡

草也重生者其類衆也

五行志

六月癸巳太白晝見在東井京師分

也

天文志

七月灃水溢害稼冬關中饑○四年六月辛巳朔烏集太

極殿梁驅之不去三月京師井水溢占曰君凶又曰兵將死京兆

藍田山竹實如麥占曰大饑

五行志

五月甲子月犯五諸侯

天文志

睿宗景雲元年十月己巳冊皇太子是日有景雲之瑞遂改元

玉海

○景雲中西京霖雨六十餘日有一僧名寶嚴自云有術法能止雨



設壇塲誦經咒其時禁屠宰寶嚴用羊二十口馬兩匹以祭祈禱

經五十餘日其雨更甚於是斬僧其雨遂止張鷟朝野僉載○二年三月

壬申熒惑入東井唐書天文志

太極元年四月熒惑太白合於東井天文志狂人段萬謙潛入承天

門登太極殿升御牀自稱天子且言我李安國也人相我三十二

當為天子五行志

元宗先天二年六月京師朝堂墀下有大蛇長丈餘大蝦蟆如盤而

目赤如火相與鬪俄而蛇入於樹蝦蟆入於草蛇蝦蟆皆陰類朝

堂出非其所也京師岐隴饑五行志

開元元年中因雨過地微潤裂至夜有光宿衛者記其處所曉

乃奏之上令鑿其地得寶玉一片如拍板上有古篆天下太平四

字百僚稱賀收之內庫開天遺事○二年三月富平縣有肉角羊五月



壬子久雨禁京城門終南山竹有華實如麥竹枯死是歲大饑民

採食之占曰國中竹栢枯不出三年有喪唐書五行志六月京師大風

拔木元宗本紀七月太白犯輿鬼東南星天文志○四年六月辛未京師

華州大風拔木元宗本紀○五年正月癸卯太廟四室壞五行志春司天

奏元象有青見其灾甚重元宗震驚問曰何祥對曰當有名士三

十人同日冤死今新及第進士正應其數其年及第李蒙者貴主

家壻上不言其事密戒主曰每有大遊宴汝愛壻可閑留其家主

居昭國里時大合樂音曲遠暢曲江漲水聯舟數艘進士畢集蒙

聞乃踰垣奔走羣衆愜望才登舟移就水中畫舫平沉聲妓篙工

不知紀極三十進士無一生者朝野僉載十一月乙卯定陵寢殿火唐書

五志○七年六月甲戌太白犯東井鉞占曰斧鉞用天文志八月老

人星見色黃玉海○八年三月庚午太白犯東井北轅唐書天文志京師



興道坊一夕陷為池居民五百餘家皆沒不見五行志十二月岐州

獲白燕進之冊府元龜○十一年二月赤兔見於后土壇玉海○十二年

七月旱帝親禱雨宮中設壇席暴立三日九月同州旱綏州霜殺

稼唐書五行志○十三年十月壬申萬年王慶築垣掘地獲寶鼎五獻

之四鼎皆有銘銘曰垂作尊鼎萬福無疆子孫永寶冊府元龜○十四

年六月戊午大風拔木發屋端門鴟尾盡落○十五年七月洛水

溢入鄜城平地丈餘死者無算同州城市及馮翊縣漂居民二千

餘家甲戌興教門樓柱灾唐書五行志億歲殿生芝草一莖玉海○十六

年關中久雨害稼唐書五行志三月京兆府三原浪井出冊府元龜○開元

中含元殿火基下出丹堊有隱語不可解言天漢三年赤元生粟

木下有子傷心過酷百家繪○十七年四月乙亥大風震電藍田山

摧百餘步畿內山也國主山川山摧川竭亡之證也占曰人君德



消政易則然

唐書五行志

五月有靈芝草產於太廟殿柱

冊府元龜

○十九

年二月癸未皇太子奏正月二十七日興慶宮親耕耤田三百餘

步既而青光紫氣伏地

玉海

六月壬申芝草生於京城之勝業寺一

本七莖心黃外紫九月庚申神羊產於京兆之興平

冊府元龜

○二十

二年五月戊辰京畿渭南等六縣大風雹傷麥秋關輔河南十餘

州水害稼

唐書五行志

○二十三年六月壬子京兆富平縣瑞大麥生

一莖五穗華州下邽縣瑞大麥生一莖三穗京畿採訪使御史中

丞盧奐奏賀十月乙未京兆府奏蓋屋縣嘉禾生

冊府元龜

十二月已

巳龍池聖德頌石自鳴其音清遠如鐘磬近石言也

唐書五行志

○二

十四年八月庚戌老人星見

玉海

十月戊申京師地震

唐書元宗本紀

○二

十五年隴州鵲哺慈鳥○二十六年三月癸巳京師地震○二十

八年四月庚辰慈鳥巢宣政殿拱辛巳又巢宣政殿拱

五行志

○二



十九年六月甘露降司農寺

玉海

天寶三載二月辛亥有星如月墜於東南墜後有聲京師訛言官

遣張振取人心肝以祭天狗人頗恐懼畿內尤甚遣使安諭之

唐書

五行志

癸酉興慶宮芝草生一本六莖五月京兆尹奏所部芝草生

八月戊子有班鹿產白鹿於苑中獻之請宣付史館上曰宮苑之

內屢薦嘉祥今又縞質霜毛變林虞之獸族殊姿馴性實雲駕之

龍媒允謂休徵用爲慰也所請者依癸巳京兆之新豐嘉禾生或

九穗六穗

冊府元龜

○五載四月宰臣李適之常列鼎具膳羞中夜鼎

躍相鬪不解鼎耳及足皆折○六載少陵原楊慎矜父墓封域內

草木皆流血慎矜令浮屠史敬思禳之退朝裸而桎梏於叢棘間

如是數旬而流血不止

唐書五行志

○七載三月有玉芝生於大同殿

之柱礎一本兩莖神光照於殿上命文武百僚入觀之○八載六



月大同殿又產芝一莖○九載二月甲戌獻陵昭陵乾陵定陵橋

陵等五陵栢樹盡垂甘露壬寅華陰郡奏白鶴見於西嶽五福峯

甘露降大羅峯之醮壇白鹿見於大羅東南峯駕鶴嶺衛叔卿得

仙處請付史館從之

冊府元龜

三月華嶽廟災關內旱

唐書元宗本紀

○十載

六月乙亥大同殿前鐘自鳴占曰庶雄為亂八月丙辰武庫災燔

兵器四十萬餘武庫甲兵之本也

五行志

十月乙丑御朝元閣有慶

雲見上賦詩羣臣畢和

冊府元龜

○十一載六月黃河中女媧墓因大

雨晦冥失其所在至乾元二年六月乙未瀕河人聞有風雷聲曉

見其墓踊出下有巨石上有雙柳各長丈餘時號風陵堆占曰塚

墓自移天下破李林甫晨起盥飾將朝取書囊視之有物如鼠躍

於地即變為狗壯大雄目張牙視林甫林甫射之中殺然有聲隨

箭沒

唐書五行志

○十三載六月乙丑朔日有食之幾既在東井十九



度京師分也

天文志

秋大霖雨害稼六旬不止九月閉坊市北門

并禁婦人入街市祭元冥太社禁明德門壞京城垣屋殆盡人亦

乏食

五行志

○十四載二月熒惑太白鬪於井鬼間至四月乃伏

天文志

志

八月己亥中書省五色雲見壬寅京兆府奏嘉禾生而獻之十

月癸酉幸華清宮有石產玉芝宰相楊國忠請宣付史館從之

冊府

元龜

十二月月食歲星在東井占曰其國亡京師分也

唐書天文志

哥舒

翰率師守潼關前軍啓行牙門旗至坊門觸落槍刃衆以為不祥

五行志

○元宗幸溫泉見白鹿升天改會昌為昭應縣

會昌解頤錄

○明

皇遭祿山之亂鸞輿西幸禁中枯松復生枝葉蔥蒨宛若新植者

後肅宗平內難重興唐祚枯松再生祥不誣矣

開天遺事

肅宗卽位十一月辛未長安雲氣如衣冠脩具太史奏天下和平之

象

冊府元龜



至德二載四月壬寅歲星熒惑太白辰星聚於鶉首從歲星也罰

星先去而歲星留占曰歲星熒惑為陽太白辰星為陰陰主外邦

陽主內邦陽與陰合中外相連以兵七月己酉太白晝見經天在

秦分

唐書天文志

昭陵石馬汗出

五行志

釋元皎於鳳翔開元寺置御藥

師場忽於法會內生一叢李樹有四十九莖元皎等表賀帝喜曰

此大瑞應答勅云瑞李繁滋國之興兆生在伽藍之內足知覺樹

之榮感此殊祥與師同慶

高僧傳

乾元元年太廟殿院北門內柱生芝草

王

○二年十月詔百官上

勤政樓觀安西兵赴陝州有狐出於樓上獲之

唐書五行志

○三年四

月丁巳有彗星於東方歷東井與鬼柳凡五旬餘不見

天文志

七月

乙亥晝渾天儀有液如汗下流

五行志

十一月丙寅左金吾衛大將

軍王晟奏明鳳門有慶雲自欄杆上起盤旋紛郁光彩明耀門



皆觀焉

冊府元龜

上元二年七月甲辰延英殿御坐梁上生玉芝一莖三花親製玉靈芝詩三章章八句曰玉殿肅肅靈芝煌煌重英發秀連葉分房

玉海

代宗寶應元年四月己巳卽位其日有慶雲見初帝至飛龍廐座前有紫雲見雲中有三白鶴徊翔又有喜鵲鳴及將卽位仗衛宿設夜分雲霧四合不辨咫尺旣曉朝呼萬歲天地清朗飛烟滿空黃氣抱日咸以爲聖感五月商州上言慶雲見七月己卯京兆府萬年縣獲三足烏獻之

冊府元龜

十二月己酉大府左藏庫火

唐書五行志

廣德元年秋野魴虫害稼關中尤甚九月大雨水平地數尺時吐蕃寇京畿以水自潰去○二年秋蝗關輔尤甚關輔饑斗米千錢

五行志



永泰元年京師饑斗米千錢

五行志

七月甲寅有三白鹿一白兔見

於禁苑觀軍容使魚朝恩受命巡苑內屯田因獲之以獻朝恩上

言請付史館編諸簡冊手詔答曰白鹿白兔王者嘉瑞和平之應

朕以寡德詎敢當焉卿及將士等務切軍儲克勤農事上元眷祐

爰獲禎符所請付史館者依是月京兆府上言鄠縣嘉禾生穗長

一尺餘穗上粒生重叠如連珠

冊府元龜

盤屋穰麥生

唐書代宗本紀

○二年

三月辛酉中書敕庫壞關中大旱自三月不雨至於六月

五行志

太

廟二室生芝

玉海

十一月乾陵赤兔見獲而獻之

冊府元龜

大曆二年七月乙丑鎮星犯水位占曰有水災九月戊申歲星守

東井占為有兵

唐書天文志

十月己卯右羽林軍獲白雀獻之乙酉有

醴泉出於京兆府之櫟陽飲者多愈痼疾

冊府元龜

十一月壬申京師

地震自東北來其聲如雷

唐書五行志

○三年四月乾陵上仙觀三尊



殿有兩雀啣柴及泥補葺殿之隙壞凡一十五處冊府元龜五月丙戌

京師地震唐書五行志七月五星聚於東井會要八月辛酉月入東井九

月壬申歲星入輿鬼占曰歲星為貴臣輿鬼為死喪唐書天文志四星

聚井會要○四年正月乙亥大雪平地盈尺百僚於宣政殿拜舞稱

賀前年冬少雪故也玉海二月丙辰京師地震唐書代宗本紀三月鎮星犯

輿鬼天文志四月雨至於九月閉坊北門置土臺臺上置壇立黃幡

以祈晴五行志五月丙戌京師地震代宗本紀六月慶雲見於西郊冊府元龜

八月己卯虎入京師長壽坊宰臣元載家廟射殺之虎西方之屬

威猛吞噬刑戮之象唐書五行志○五年六月庚戌太白入東井天文志

○六年四月戊寅藍田西原地陷五行志七月己丑華州言甘露降

冊府元龜八月丁丑獲白兔於太極殿之內廊唐書五行志○七年四月丁

巳熒惑入輿鬼天文志○八年京兆大旱京兆尹黎幹造土龍自與



巫覡對舞彌月不應又禱孔子廟帝笑曰邱之禱久矣使毀土龍

減膳節用既而澍雨

潛確類書

五月丁丑鳳翔府上言天興縣嘉禾生

一莖二穗六月戊申梁州獲白雀二獻之七月乙未蓬萊池獲毛

龜出示百僚

冊府元龜

己卯太白入東井留七日非常度也占曰秦有

兵

唐書天文志

九月丁丑京兆府上言梨樹及林檎樹並連理辛巳華

州言嘉禾生

冊府元龜

武功獲大鳥肉翅狐首四足有爪長四尺餘毛

赤如蝙蝠群鳥隨而噪之近羽垂孽也

唐書五行志

十月丁卯鳳翔獲

白鼠獻之

冊府元龜

壬戌月入輿鬼掩質星十一月甲寅月入東井

唐書

天文志

鳳翔府上言天興縣禾生一莖三穗

冊府元龜

武功櫟陽民家牛

生犢二首

五行志

○九年三月丁未熒惑入東井

天文志

京兆府獲白

鵲一獻之四月甲午隴州獲白鵲一獻之五月丁巳隴州獲白鵲

獻之京兆府上言瑞麥生九莖同穎

冊府元龜

七月壬戌太白入輿鬼



唐書天文志

十月辛卯鳳翔府上言嘉禾生一莖兩穗

冊府元龜

十一月

州夏陽有山徙於河上聲如雷○十年二月昭應婦人張產一男

二女

唐書五行志

三月鳳翔府獲白雀一獻之

冊府元龜

四月甲申雷電暴

風拔木飄瓦人有震死者京畿害稼者七縣

唐書五行志

十二月月出

東方上有十餘道若疋練貫井鬼柳

天文志

○十一年七月戊子夜

澍雨京師平地水尺餘溝渠漲溢壞民居千餘家

五行志

○十二年

正月乙丑渭北行營所獲二赤雀獻之六月癸未苑內獲白鼠一

出示百條

冊府元龜

秋京畿大雨雨水害稼

唐書五行志

七月乙亥熒惑入東

井

天文志

十一月辛亥京兆府上言甘露降於城內靖恭坊之南街

柳樹味如飴蜜

冊府元龜

○十三年二月太僕寺有泥像左臂上有黑

汗滴下以紙承之皆血也五月左羽林軍有鸚鵡乳鵲

唐書五行志

○

十四年春歲星在東井

天文志



德宗建中元年四月己亥京師地震

五行志

十一月月蝕歲星在秦分

占曰其國亡是月歲星食天尸天尸與鬼中星占曰有妖言小人

在位君王失樞死者大半○二年六月熒惑太白闢於東井

天文志

○三年自五月不雨至於七月六月甲子京師地震九月己亥夜

白虎入宣陽里傷人三詔朝獲之

五行志

○四年四月甲子京師地

震生毛

德宗本紀

五月辛巳又震

五行志

六月熒惑太白復闢於東井京

師分也金火罰星闢者戰象也

天文志

八月庚申有星隕於京師

德宗本紀

朱泚既僭號名其舊第曰潛龍宮占者以為易稱潛龍勿用此

敗祥也朱泚未敗前两月有童謠曰一隻筋兩頭朱五六月化為

蛆

五行志

興元元年中書省枯柳復榮

五行志

貞元元年春旱無麥苗至於八月旱甚灞澇將竭井皆無水夏



西盡河隴群飛蔽天

五行志

十一月京兆府奏有人於長興坊得玉

璽文曰天子信璽中書門下表賀將付所司制曰可

冊府元龜

○二年

二月乙丑有野鹿至於含元殿前獲之壬午又有鹿至於含元殿

前獲之占曰有大喪五月己酉京師地震六月丁酉大風雨京城

通衢水深數尺有溺死者

唐書五行志

○三年七月京兆府獻嘉禾異

本同穗

冊府元龜

十一月丁丑夜京師地震

唐書五行志

十二月同州沙苑

監上言白鹿見

冊府元龜

○四年正月庚戌朔夜京師地震辛亥壬子

丁卯戊辰庚午癸酉甲戌乙亥皆震金州尤甚江湓山裂屋宇多

壞人皆露處庚戌朔德宗御含元殿受朝賀質明殿階及欄檻三

十餘間自壞衛士死者十餘人含元路寢大朝會之所御也正月

朔一歲之元王者之事天所以儆者重矣二月郊牛生犢六足足

多者下不一郊所以奉天壬午京師地又震甲申乙酉丙申皆震



有豕生子兩足四首首多者上不一也三月甲寅己未庚午辛未

京師地又震中書省梧桐樹有鵲以泥為巢鵲巢知歲次於羽虫

為有知今以泥露巢遇風雨壞矣

唐書五行志

四月宗正寺獻毛龜

冊府

元龜

五月丙寅丁卯京師地又震

唐書五行志

七月神策軍獻瑞瓜三蔓

合為一蒂而生三瓜

冊府元龜

八月甲午京師地又震有聲如雷甲辰

又震灞水暴溢殺百餘人

唐書五行志

○六年正月坊州言櫪連理

冊府

元龜

閏三月庚申太白辰星合於東井占為兵憂

唐書天文志

關輔旱

五行志

志

八月京兆府奏嘉禾異本同穎

冊府元龜

○七年關輔牛大疫死者

十五六

唐書五行志

八月同州言祥雲見

冊府元龜

○八年正月丁亥許州

人李狗兒持杖上含元殿擊欄檻伏誅五月己未暴風發太廟屋

瓦毀門闕官署廬舍不可勝紀○九年四月辛酉地震有聲如雷

關輔尤甚壞城壁廬舍地裂水湧○十年四月戊申京師地震癸



丑又震有大鳥集宮中食雜骨獲之不食死六月辛未晦水鳥集

左藏庫唐書五行志○十一年二月同州獻五色鴈六月華州獻白鳥

○十二年六月京兆府進白鼠京兆府奉先等八縣旱損秋禾一

萬頃十二月甲子左神策軍進白雀冊府元龜○十三年四月幸興慶

宮龍堂禱雨有一白鷓鴣浮沉水際群類翼從左右以為龍之變

化玉海七月乙未京師地又震○十四年京師饑唐書五行志九月丁卯

中書門下奏賀苑中白鹿冊府元龜○十五年正月戊申狂人劉忠詣

銀臺稱白起令上表天下有火災三月京畿興平醴泉等縣雨雹

唐書五行志三月以久旱令李巘鄭雲逵禱於炭谷秦嶺祈雨五月丁

未延州進元兔七月鳳翔府鷄足山慶雲見冊府元龜○十七年五月

壬戌朔日有食之在東井十度唐書天文志五月戊寅好畤縣風雹害

麥五行志○十八年甘露降元和殿桐木丁香木玉海○十九年秋關



輔饑○二十一年正月甲戌雨赤雪於京師

唐書五行志

順宗永貞元年京畿長安等九縣山水害稼

五行志

憲宗元和元年商州洪崖治役夫將化為虎衆以水沃之不果化鄜

坊等州雹

五行志

○二年四月丙子太白犯東井北轅

天文志

七月邠

州霜殺稼○三年四月大風毀含元殿欄檻二十七間占為兵起

○四年四月冊立皇太子以雨霑服罷十月再擇日冊立又以雨

霑服罷丁未渭南暴雨漂民居二百餘家○五年三月丙子大風

毀崇陵上宮衙殿鴟尾及神門戟竿壞行垣四十間○六年十月

鄜坊水○七年八月京師地震草木皆搖○八年夏華同二州旱

四月長安西市有豕生二子三耳八足自尾分為二足多者下不

一也鄜坊等州雹六月庚寅京師大風雨毀屋飄瓦人多壓斃者

丙申富平大風拔聚木千餘株京師大水城南深丈餘入明德殿



門猶漸車服渭水漲絕濟

五行志

七月月犯五諸侯

天文志

○九年春

關內饑

五行志

○十年六月辛未歲星熒惑太白辰星合於東井占

曰中外相連以兵

天文志

秋鄜坊等州風雹害稼十月京師地震

五行

志

十一月盜焚獻陵寢宮○十一年盜斷建陵門戟

憲宗本紀

二月丁

丑京師地又震

五行志

四月丙辰太白犯輿鬼占曰有戮臣五月丁

卯歲星辰星合於東井

天文志

京畿大雨水昭應尤甚六月京畿水

害稼八月甲午渭水溢毀中橋

五行志

乙酉歲星辰星合於東井占

曰爲謀變更事

天文志

十一月甲戌元陵火

憲宗本紀

○十二年六月乙

酉京師大雨水含元殿一柱傾市中水深三尺毀民居二千餘家

五行

○十三年六月朔日有食之在輿鬼一度京師分也

天文志

○

十五年京畿興平醴泉等縣雹傷麥七月丁未苑中土山摧壓苑

二十人八月久雨閉坊市北門已卯同州雨雪害稼

五行志

十一月



壬子月犯東井北轅

天文志

穆宗卽位戊辰始朝羣臣於宣政殿是夜地震

五行志

長慶元年正月丙午月掩東井鉞遂犯南轅第一星

天文志

七月壽

昌殿柱生玉芝一莖六尺

玉海

○二年六月大風震電落太廟鴟尾

破御史臺樹七月好時山水漂民居三百餘家十月夏州大風飛

沙爲堆高及城堞

五行志

○三年四月同州言文宣王廟甘露降

冊府

元龜○四年三月庚午太白犯東井北轅遂入井中晝見經天七日

而出因犯輿鬼京師分也

天文志

民徐忠信潛入浴室門六月京師

雨雹如彈丸庚寅大風毀延喜門及景風門

五行志

丙戌鎮星依曆

在觜觿羸行至參六度當居不居失行而前遂犯井鉞占曰羸爲

王不寧鉞主斬刈而又犯之其占重癸未熒惑犯東井丁亥入井

中八月庚辰熒惑犯鎮星於東井鎮星旣失行犯鉞而熒惑復往



犯之占曰內亂十二月戊子月掩東井天文志

敬宗寶曆元年四月壬寅熒惑入輿鬼掩積尸天文志秋酈坊二州暴

水華州及京畿奉天等六縣水害稼五行志七月甲辰填星犯東井

天文志八月邠州霜殺稼十一月庚辰鎮星復犯東井癸未月犯東

井五行志○二年八月月入東井熒惑鎮星復合於東井輿鬼間庚

戌熒惑犯輿鬼天文志十二月延州人賀文妻一產四男五行志

文宗太和元年同州野畋虫害稼夏京畿同州旱八月癸卯京師見

赤氣滿天五行志○二年內昭德寺火延禁中野狐落野狐落者宮

人所居也死者數百是日宰相兩省官京兆尹樞密皆集於日華

門督神策兵救火獨御史府不至溫造自劾曰臺擊賊恐人緣以

為姦白孔六帖夏京畿水害稼唐書五行志七月熒惑掩輿鬼質星十月丁

卯月掩東井北轅天文志十月狂人劉德廣入含元殿○三年四月



同官縣暴水漂沒二百餘家十月癸丑伏內火五行志十一月庚子

京兆上言奉先富平美原雲陽華原三原同官渭南八縣早霜損

稼二千三百四十頃冊府元龜○四年夏鄜坊水漂沒三百餘家五月

巳卯通化南北二門鎖不可開鑰入如有持之者破其管門乃啓

五行志丙午歲星太白合於東井天文志秋鄜坊等州雹五行志十二月

京畿大水害田稼冊府元龜○五年正月庚子朔京師陰雪彌旬夏京

畿奉先渭南等縣雨雹唐書五行志○六年關輔旱○八年三月定陵

臺大雨震廡下地裂二十有六步占曰士庶分離大臣專恣不救

大敗五月巳巳飛龍駒廐中火夏陝華同等州旱六月癸未暴風

壞長安縣署及經行寺塔十二月禁中昭應寺火○九年三月乙

卯京師地震屋瓦皆墜戶牖間有聲四月大風拔木萬株墮舍元

殿四鵹尾拔殿廷樹三壞金吾伏舍廢城門樓觀內外三十餘所



光化門西城十數雉壞秋京兆陝華同州旱京師訛言鄭注爲上合

金丹生取小兒心肝密旨捕小兒無算往往陰相告曰某處失幾

兒矣方士言金丹可致神仙蓋誕妄不經之語或信而服之則發

熱多死如有所戒云小兒無辜者取其心肝將有殺戮象鄭注爲

鳳翔節度使將之鎮出開遠門旗竿折十二月京師苦寒

五行志

開成元年二月乙亥京師地又震有蟻聚長五六十步濶五尺至

一丈厚五寸至一尺者夏鳳翔麟遊縣暴雨水毀九成宮壞民舍

數百家死者百餘人燕集蕭望之塚○二年三月真興門外鵲巢

於古塚鵲巢知避歲而古占又以高下卜水旱今不巢於木而巢

於塚不祥宮中有衆蛇相與鬪

五行志

六月庚申太白入東井甲申

客星出於東井

天文志

十一月乙丑夜京師地又震

五行志

○三年二

月戊午熒惑入東井三月乙酉入輿鬼五月辛酉太白犯輿鬼

天文志



志夏河決侵鄜坊五行志

○四年二月乙酉月掩東井天文志

四月有

輦出於太廟獲之五行志

八月壬申熒惑犯鉞遂入東井天文志

十一

月甲戌京師地又震十二月乙卯乾陵火五行志

歲星熒惑俱逆行

失色合於東井京師分也○五年二月壬申熒惑入輿鬼四月太

白歲星入輿鬼天文志

六月有禿鶯群飛集禁苑七月霖雨葬文宗

龍輶陷不能進五行志

武宗會昌元年七月山南等州蝗五行志

閏八月丁酉熒惑入輿鬼中

占曰有兵喪○二年六月丙寅太白犯東井天文志

十二月癸未京

師地震○三年六月西內神龍寺火萬年縣東市火焚廬舍甚衆

五行志

七月癸巳熒惑入東井色蒼赤動搖井中八月丁丑熒惑入

輿鬼天文志

○六年八月葬武宗辛未靈駕次三原縣夜大風行宮

慢城火五行志



宣宗大中三年十月辛巳上都及夏州地震壞廬舍壓斃數十人

志○十年八月熒惑犯東井

天文志

懿宗咸通元年五月上都地震○五年十月貞陵隧道摧陷神策軍

有浮屠像懿宗常跪禮之像沒地四尺○六年八月同華蝗十一

月己卯晦潼關夜中大風山如吼雷河噴石鳴群鳥亂飛重關傾

側○七年夏同華及京畿蝗○九年六月久雨崇明德門關內蝗

秋關內饑

五行志

○懿宗時關中大旱貧者以蓬子爲麪槐葉爲齏

食貨志

僖宗卽位是日黑氣如盤自天屬含元殿庭

五行志

乾符三年春京師饑十二月京師地震有聲○五年內臣有刻木

象頭以褻幘頭百官效之工門如市度木斫之曰此斫尚書頭此

斫將軍頭近服妖也○六年中書政事堂忽旦有苑人血污滿地



不知主名二月京師地震藍田山裂出水又御井水色赤而腥漂  
之得一苑女子腐爛近赤祥也五月丁酉宣授宰臣豆盧瑑崔沆  
制殿庭氛霧四塞及百官班賀於政事堂雨雹如鳧卵大風雷雨  
拔木五行志

廣明元年華嶽廟元宗御製碑隱隱然有聲聞數里間浹旬乃止

白孔六帖四月京師雨雹大風拔木唐書五行志

中和元年有異星出於輿鬼占者以爲惡星天文志九月長安馬生

人京房易傳曰諸侯相伐厥妖馬生人一曰民流亡○二年關內

大饑○四年關內大饑人相食黃巢未入京師都人以黃米及黑

豆屑蒸食之謂之黃賊打黑賊五行志

光啓元年有彗星於積薪積水之間天文志○二年春鳳翔鄠縣女

子未甞化爲丈夫旬日而苑延州膚施有牛苑復生四月僖宗在



鳳翔馬尾皆咤蓬如簣咤怒象七月鳳翔麟遊草生如旗狀占曰其野有兵冬鄜州洛交有蛇見於縣署復見於州署蛇冬則蟄易

曰龍蛇之蟄以存身也

五行志

文德元年八月熒惑守輿鬼占曰多戰死

天文志

昭宗乾寧元年有星孛於鶉首京師分也

天文志

光化三年武德殿前鐘聲忽嘶噎冬京師旱至於四年春○四年

冬昭宗在東內武德門內煙霧四塞門外日色皎然

五行志

天復元年武德殿前鐘聲又變小

五行志

自五月丁酉至於己亥太

白晝見經天在井度

天文志

○二年帝在鳳翔十一月丁巳日南至

夜驟風有鳥數千迄明飛噪數日不止自車駕在岐常有鳥數萬

棲殿前諸樹岐人謂之神鴉

五行志

○三年冬熒惑徘徊於東井間

久而不去京師分也

天文志

天復甲子歲自隴而西迄於褒梁之境



數千里內亢陽民多流散自冬經春饑民啖食草木至有骨肉相食者甚多是年忽山中竹無巨細皆放花結子饑民採之舂米而食珍如粳糯其子粗顏色紅纖與今紅粳不殊其味尤更馨香數州之民皆挈累入山就食之至於溪山之內居人如市

玉堂閒話

天祐元年十月京師大饑

唐書五行志

○二年四月甲辰彗星見於北

河兩河為天闕在東井間而北河中國所經也

天文志

○昭宗遷於

鳳翔朱梁率諸道甲馬奉迎車駕時候王將帥在岐下者皆以珠

顆盤幘脚貫以銀線而簪之又軍人咸以珠飾巾競相誇尚及朱

梁篡位乃知朱已居人上者久矣

秦再思記異

○昭宗時十六宅諸王

以華侈相尚巾幘各自為制度都人效之則曰為我作某王頭飾者以為不祥昭宗時有禿鷲鳥巢寢殿隅帝親射殺之唐末京師婦人梳髮以兩鬟抱面狀如椎髻時人謂之拋家髻又世俗尚以



琉璃爲釵釧近服妖也拋家琉璃皆播遷之兆云

唐書五行志



阿波道元

方丈集

三



